

## Iso Masihning nasl-nasabi

**1:1** Ibrohim o`g`li, Dovud o`g`li Iso Masihning nasabnomasi. **2** Ibrohimdan Is hoq tug`ildi. Is hoqdan Yoqub tug`ildi. Yoqubdan Yahudo va uning aka-ukalari tug`ildilar. **3** Yahudo va Tamaradan Paras hamda Zarah tug`ildilar. Parasdan Hasro`n tug`ildi. Hasro`ndan Aram tug`ildi. **4** Aramdan Amminadab tug`ildi. Amminadabdan Nahsho`n tug`ildi. Nahsho`ndan Salmo`n tug`ildi. **5** Salmo`n va Rahobadan Bo`az tug`ildi. Bo`az va Rufdan Obid tug`ildi. Obiddan Ishay tug`ildi. **6** Ishaydan podshoh Dovud tug`ildi. Podshoh Dovud va Uriyoning sobiq xotinidan Sulaymon tug`ildi. **7** Sulaymondan Rahaba im tug`ildi. Rahaba imdan Abiyoyo tug`ildi. Abiyoyodan Oso tug`ildi. **8** Osodan Yo`shafat tug`ildi. Yo`shafatdan Yo`ram tug`ildi. Yo`ramdan Uzziyo tug`ildi. **9** Uzziyodan Yo`tam tug`ildi. Yo`tamdandan Ahaz tug`ildi. Ahazdan Hizqiyoyo tug`ildi. **10** Hizqiyoyodan Manashe tug`ildi. Manashedan Amo`n tug`ildi. Amo`ndan Yo`shiyoyo tug`ildi. **11** Yo`shiyoyodan Yo`akim tug`ildi. Yo`akimdan Bobilga surgun bo`lish davrida Yako`niyo bilan aka-ukalari tug`ildilar. **12** Bobildagi surgunlik davridan keyin Yako`niyodan Sha ltiel tug`ildi. Sha ltielidan Zarubobil tug`ildi. **13** Zarubobildan Abihud tug`ildi. Abihuddan Elyoqim tug`ildi. Elyoqimdan Azo`r tug`ildi. **14** Azo`rdan Sado`q tug`ildi. Sado`qdan Axim tug`ildi. Aximdan Elihud tug`ildi. **15** Elihuddan Il áazar tug`ildi. Il áazardan Mattan tug`ildi. Mattandandan Yoqub tug`ildi. **16** Yoqubdan Maryamning eri Yusuf tug`ildi. Maryamdan esa Masih deb atalgan Iso tug`ildi. **17** Shunday qilib, Ibrohimdan Dovudgacha hammasi bo`lib o`n to`rt nasl, Dovuddan Bobil surgunligigacha o`n to`rt nasl va Bobil surgunligidan Masih kelishigacha o`n to`rt nasldir.

## Iso Masihning tug`ilishi

**18** Iso Masihning tug`ilishi shunday sodir bo`ldi: Uning onasi Maryam Yusufga unashtirib qo`yilgan edi. Ularning nikohidan oldin Maryam Muqaddas Ruhdan homilador ekani ma lum bo`ldi. **19** Uning eri Yusuf esa solih odam bo`lib, Maryamni sharmanda qilishni istamay, yashirincha qo`yib yuborish niyatida bo`ldi. **20** Buni o`ylab ko`rganidayoq, Xudovandning bir farishtasi tushida unga ko`rinib: “Ey Dovud o`g`li

Yusuf! - dedi, - Sen Maryamni o`zingga xotinlikka olishdan qo`rqma; chunki uning vujudidagi homila Muqaddas Ruhdan paydo bo`lgan. **21** U o`g`il tug`adi va Uning ismini Iso qo`yasan, chunki U O`z xalqini gunohlaridan qutqaradi. **22** Bularning bari esa Xudovandning payg`ambar orqali aytgani bajo kelishi uchun ro`y berdi. Payg`ambar: **23** “Qiz homilali bo`lg`ay va o`g`il tuqqay, Uning ismini esa Immanuil qo`yurlar”,? deb karomat qilgan edi. Immanuil - “Xudo biz bilan” demakdir”. **24** Yusuf uyg`ongach, Xudovandning farishtasi unga buyurganidek qildi va Maryamni xotinlikka oldi. **25** Lekin u tug`maguncha unga yaqinlashmadi. Nihoyat, Maryam o`zining to`ng`ich o`g`lini tug`di va Uning ismini Iso qo`ydi.

### Munajjimlarning Isoni ziyorat qilishi

**2:1** Iso podshoh Hirod davrida, Yahudiyaning Baytlahm shaharchasida tug`ilganidan keyin, sharqdan Quddusga munajjimlar keldi. **2** Ular: - Yahudiylarning podshohi bo`lib tug`ilgan bola qayerda? Biz sharqda Uning yulduzini ko`rdik, Unga ta`zim qilgani keldik, - dedilar. **3** Podshoh Hirod buni eshitgach, u bilan butun Quddus bezovtalanib ketdi. **4** U barcha yahudiy oliy ruhoniylari va ulamolarini to`plab, ulardan Masihning qayerda tug`ilishi kerakligini so`radi. **5** Ular esa: - Yahudiyaning Baytlahm shahrida, - deyishdi unga, - chunki payg`ambarning kitobida shunday yozilgan: **6** “Ey Yahudo diyorida Baytlahm! Sen Yahudo ulug`laridan aslo kam emassan. Zero xalqim - Isroilni boquvchi Dohiy Sendan kelib chiqajak”. **7** O`shanda Hirod munajjimlarni yashirincha chaqirib, ulardan yulduzning paydo bo`lgan aniq vaqtini bilib oldi. **8** So`ng ularni Baytlahmga yuborib: - Boringlar, chaqaloq haqida sinchiklab surishtiringlar. Uni topgach, menga xabar beringlar, toki men ham borib Unga ta`zim qilayin, - dedi. **9** Munajjimlar podshohning so`zlariga quloq solib jo`nadilar. Ular sharqda ko`rgan yulduz esa ularga yo`l ko`rsatib bordi va nihoyat, chaqaloq yotgan joy tepasiga kelib to`xtadi. **10** Ular yulduzni ko`rib, haddan ziyod quvondilar. **11** Uyga kirib, chaqaloqni va Uning onasi Maryamni ko`rdilar-da, muk tushib, chaqaloqqa ta`zim qildilar. So`ng xazinalarini ochib, Unga oltin, xushbo`y tutatqilar va

mumiyo tortiq qildilar. **12** Hirodga qaytmaslik haqida tushlarida ogohlantirilgandan keyin, boshqa yo`l bilan o`z yurtlariga qaytib ketdilar.

### Misrga qochish

**13** Munajjimlar jo`nab ketganlaridan so`ng, Xudovandning bir farishtasi Yusufga tushida ko`rinib: “O`rningdan tur! - dedi. - Chaqaloq bilan onasini olib, Misrga qoch va men senga biror narsa aytmagunimcha, u yerda qolgin. Chunki Hirod chaqaloqni qidirib topsa, uni halok qilish niyati bor”. **14** Yusuf shu kechasiyoq turib, chaqaloq bilan onasini olib, Misrga qarab yo`lga tushdi. **15** Hirodning ajali yetgunigacha, u yerda qoldi. Shu tariqa Xudovandning: “Men O`g`limni Misrdan chaqirib oldim”, - deb payg`ambar orqali aytgan so`zi bajo keldi.

### Baytлахmda chaqaloqlarni qirg`in qilish

**16** Hirod munajjimlar tomonidan aldanganini payqagach, juda qattiq g`azablandi. Ulardan bilib olgan vaqtga ko`ra, Baytлахm hamda uning tevarak-atroflaridagi ikki yosh va undan kichik bo`lgan hamma o`g`il bolalarni qilichdan o`tkazgani kishi yubordi. **17** O`shanda Yeremiya payg`ambarning ushbu karomati bajo keldi: **18** “Ramadan bir nido eshitilur, Cheksiz bir nolayu ohu fig`on, bu. Bolalari uchun yig`lar Rohila, Hech na yupatolmas, endi ular yo`q”.

### Misrdan qaytib kelish

**19** Hirodning o`limidan keyin Xudovandning bir farishtasi Misrda Yusufga tushida ko`rinib: **20** “O`rningdan tur! - dedi. - Chaqaloq bilan onasini olib, Isroil mamlakatiga yo`l ol. Chunki chaqaloqning joniga qasd qilganlar olamdan o`tdi”. **21** Shunda Yusuf chaqaloq bilan onasini olib jo`nadi, Isroil mamlakatiga qaytib keldi. **22** Ammo Yahudiyada Hirod o`rniga uning o`g`li Arxelay taxtga chiqqanini eshitib, u yerga borishga qo`rqdi. Biroq tushida vahiy kelgach, u Jalila yurtiga bordi. **23** U yurtning Nosira degan shahrida joylashdi. Shunday qilib, “U nosiralik deb atalgay”, - degan payg`ambar so`zi bajo keldi.

## Yahyo payg`ambarning kelishi

**3:1** O`sha kunlarda Yahyo payg`ambar paydo bo`lib, Yahudiya cho`lida voizlik qila boshladi. **2** U: “Tavba qilinglar, chunki Osmon Shohligi yaqinlashdi!” - deb xitob qilar edi. **3** Bu voqea esa Isha yo` payg`ambarga vahiy qilingan shu oyatga to`g`ri keladi: “Mana, cho`lda nido yangramoqda: Xudovand yo`lini tayyorlangiz, Ravon aylangiz so`qmoqlarin! - deya”. **4** Yahyoning o`zi tuya junidan kiyim kiyib, beliga teridan kamar taqar edi. Uning yeguligi esa chigirtka bilan yovvoyi asal edi. **5** Quddusda, Yahudiya yurti bo`ylab va O`rdun daryosi atrofida yashovchilarning hammasi Yahyo payg`ambarning oldiga chiqar edi. **6** Ular gunohlarini e`tirof etib, Yahyoning buyrug`i bilan O`rdun suviga cho`mib imon keltirar edilar. **7** Farziy va sadduqiy mazhablaridan ham talay kishi cho`mish uchun uning oldiga kelayotganlarini Yahyo ko`rib, ularga dedi: “Voy ilonlar zoti! Boshingizga keladigan Xudo g`azabidan qochib qutulishingizni sizlarga kim uqtirdi? **8** Bundan buyon tavba qilganingizga yarasha hosil beringlar! **9** “Ibrohim bizning otamiz”, deb ko`nglingizdan o`tkazmanglar. Men sizlarga aytamanki, Xudo shu toshlardan Ibrohimga avlod tiklashga qodir. **10** Hozirdanoq daraxtlar ildizida bolta yotibdi-ku. Yaxshi meva bermagan har qanday daraxt kesilib olovga tashlanadi. **11** Men sizlarni tavbaga chaqirish uchun suvga cho`mdirib yuribman. Lekin mening ketimdan Kelayotgan mendan qudratlidir. Men Uning choriqlarini ko`tarishga ham arzimayman. U sizlarni Muqaddas Ruhga va olovga cho`mdiradi. **12** Uning panshaxasi qo`lida tayyor turibdi. U o`z xirmonini shopirib tashlaydi; bug`doyini omborga to`plab, somonni so`nmas o`tda yondirib yuboradi”.

## Xudoning Isoni tasdiqlashi

**13** O`shanda Iso Yahyoning huzurida suvga cho`mish uchun Jaliladan O`rdun daryosi bo`yiga keldi. **14** Lekin Yahyo Isoni to`xtatmoqchi bo`lib: - Men Sening huzuringda imon keltirishim kerak edi. Sen bo`lsang, mening oldimga kelyapsanmi? - dedi. **15** Iso unga javob berib: - Endi rozi bo`l, chunki biz shu yo`sinda ilohiy amrni to`la bajarishimiz o`rinlidir, - dedi. Shundan keyin Yahyo Isoga izn berdi. **16** Iso daryoga tushdi. U

suvdan chiqqan zahoti, osmon ochilib ketdi va Xudoning Ruhi kaptarday Isoning ustiga tushib qo`ngani ko`rindi. **17** Osmondan esa: “Bu Mening sevikli O`g`limdir, Undan mamnunman”, - degan nido keldi.

### Isoning vasvasa qilinishi

**4:1** O`shanda Iso, iblisning sinovidan o`tish uchun Muqaddas Ruh tomonidan sahroga olib borildi. **2** U qirq kun va qirq kecha ro`za tutib, oxiri och qoldi. **3** Shunda vasvasa qiluvchi Isoning yoniga kelib Unga: - Agar Sen Xudoning O`g`li bo`lsang, aytgin, bu toshlar nonga aylansin! - dedi. **4** Iso unga javoban dedi: - Tavrotda: “Inson birgina non bilan emas, balki Xudoning og`zidan chiqqan har bir so`z bilan yashaydi”, deb yozilgan. **5** Keyin iblis Isoni tabarruk shaharga keltirdi va ma`badning tepasida turg`izib, **6** Unga dedi: - Agar Sen Xudoning O`g`li bo`lsang, O`zingni pastga tashla-chi. Chunki Zaburda shunday yozilgan-ku: “U Sen haqda O`z farishtalariga amr etgay: Ular Seni qo`llarida ko`tarib ketar, Oyog`ing ham toshga qoqilib ketmas”. **7** Iso unga: - “Egang Xudovandni sinama”, deb yozilgani ham bor, - dedi. **8** Iblis Isoni yana juda baland toqqa olib chiqib ketdi. Dunyoning barcha saltanatlarini hamda ularning hashamatini Unga ko`rsatib: **9** - Agar tiz cho`kib menga sajda qilsang, bularning hammasini Senga beraman, - dedi. **10** Shunda Iso: - Yo`qol ko`zimdan, shayton! Chunki Tavrotda: “Egang - Xudovandga sajda qil, birgina Unga itoatda bo`l”, deb yozilgan, - dedi. **11** Shundan so`ng iblis Isoni tark etdi va farishtalar esa kelib, Isoga xizmat qila boshladilar.

### Isoning xizmatini boshlashi

**12** Iso Yahyoning hibsga olinganini eshitgach, Jalilaga qaytib bordi. **13** U Nosira shahrida ko`p qolmay, Zavulun va Naftoli yurtidagi ko`l bo`yida joylashgan Kafarnahum shahriga kelib o`rnashdi. **14** Shunday qilib, Isha yo` payg`ambarga vahiy bo`lgan ushbu oyat bajo keldi: **15** “Ey Zavulun diyori va Naftoli diyori, O`rdun nahrining naryog`ida, Dengiz yo`lida joylashgan majusiylar Jalilasi! **16** Zulmatda qolib kelgan xalq katta ziyoni ko`rdi, O`lim soyasiga burkangan el ufqlari yorishdi”. **17** Shu

kundan boshlab Iso voizlik qiladigan bo`lib: “Tavba qilinglar, chunki Osmon Shohligi yaqinlab qoldi”, - deb aytar edi.

### Isoning dastlabki shogirdlari

**18** Jalila ko`li yonidan o`tayotganida, Iso ko`lga to`r tashlab turgan ikki aka-uka - Butrus deb ataluvchi Simun va uning ukasi Idrisni ko`rib qoldi. Ular baliqchi edilar. **19** Iso ularga: “Mening orqamdan yuringlar, Men sizni inson ovchilari qilaman”, - dedi. **20** Aka-uka darhol to`rlarini qoldirib, Uning orqasidan ergashdilar. **21** U yerdan o`tayotib, Iso boshqa ikki aka-uka - Zabadiyning o`g`li Yoqub va uning ukasi Yuhannoni ko`rib qoldi. Ular otalari Zabadiy bilan birga qayiqda to`rlarini yamab o`tirishgan edi. Iso ularni ham chaqirdi. **22** Ular ham darhol qayiqni va otalarini qoldirib, Isoning orqasidan ergashdilar.

### Isoning voizlik va shifokorlik xizmati

**23** Iso butun Jalilani aylanib chiqdi. U yurtning ibodatxonalarida ta`lim berib, Xudoning Shohligi to`g`risidagi Xushxabarni e`lon qilib, odamlardagi har turli kasallik va darmonsizlikni shifolab yurdi. **24** U haqdagi xabar butun Suriyaga yoyildi. Turli-tuman dardu illatlardan qiynalib yurganlar, jinga chalinganlar, tutqanoq va shol kasaliga yo`liqqanlarning hammasini Isoning oldiga keltirishar, U esa ularni sog`aytirar edi. **25** Jalila va O`nkent viloyatidan, Quddusdan, Yahudiya hamda O`rdunning narigi tomonidagi yurtlardan kelgan ko`plab xaloyiq Uning orqasidan ergashib bordi.

### Haqiqiy baxtiyorlik

**5:1** Iso talay xaloyiqni ko`rib, toqqa chiqib o`tirdi. Shogirdlari Uning oldiga kelishdi. **2** Iso ularga ta`lim berish uchun og`zini ochib, dedi: **3** “Ruhan kambag`al bo`lganlar baxtlidir, Chunki Osmon Shohligi ularnikidir. **4** Yig`layotganlar baxtlidir, Chunki ular tasalli topur. **5** Beozor bo`lganlar baxtlidir, Chunki ular yer yuziga ega bo`lur. **6** Adolatga ochu chanqoqlar baxtlidir, Chunki ular to`q bo`lur. **7** Rahmdil bo`lganlar baxtlidir, Chunki ular rahm-shafqat topur. **8** Pokdil bo`lganlar baxtlidir,

Chunki ular Xudoni ko`rur. **9** Tinchlik o`rnatuvchilar baxtlidir, Chunki ular Xudo o`g`illari deyilur. **10** Adolat yo`lida jabr ko`rganlar baxtlidir, Chunki Osmon Shohligi ularnikidir. **11** Men tufayli odamlar sizni haqoratlab quvg`in etsa, siz haqda yolg`on gapirib fisqu g`iybat qilsa, baxtlisiz! **12** Sevininglar va xursand bo`linglar, chunki sizga osmon mukofoti buyuk. Sizdan avval o`tgan payg`ambarlar ham shunday quvg`in bo`lgan”.

### Tuz va nur haqida

**13** “Siz - yerning tuzisizlar. Agarda tuz kuchini yo`qotsa, uni yana qanday sho`r qilish mumkin? U endi chiqitga tashlab yuboriladi, oyoq ostida poymol bo`lishdan boshqaga yaramaydi. **14** Siz - dunyoning nurisizlar. Tog`ning tepasida qurilgan shahar yashirin qololmaydi. **15** Shuningdek, shamni yoqib, keyin idish bilan yopib qo`yishmaydi. Uydagilarning hammasiga yorug`lik bersin, deb uni shamdonga qo`yishadi. **16** Ayni ravishda sizning nuringiz ham insonlar oldida shunday porlasinki, ular yaxshi ishlaringizni ko`rib, osmondagi Otangizni ulug`lasinlar”.

### Ilohiy Buyruq haqida

**17** “Meni Tavrot yoki payg`ambar oyatlarini bekor qilgani keldi, deb o`ylamanglar. Men bekor qilgani emas, balki bajo keltirgani keldim. **18** Sizga chinini aytayin: yeru osmon tugamaguncha va taqdir etilgan hamma narsa amalga oshmaguncha, Tavrotdan na bir harf, na bir nuqta o`chadi. **19** Shunday qilib, kim bu amrlarning eng kichigini ham insonlarga buzib o`rgatsa, Osmon Shohligida eng kichik bo`ladi. Lekin kim bu amrlarni bajarib boshqalarga o`rgatsa, Osmon Shohligida buyuk bo`ladi. **20** Sizlarga aytib qo`yay: agar sizning solihligingiz ulamolar va farziylarning solihligidan ustun kelmasa, Osmon Shohligiga kirolmaysizlar”.

### G`azab va jazo haqida

**21** “Qadimgilarga: “Odam o`ldirma; kim odam o`ldirsa, javobgarlikka tortiladi”, - deb aytilganini eshitgansizlar. **22** Lekin Men sizga aytaman: kimki birodariga behuda g`azablansa, javobgarlikka tortiladi. Kimki

birodariga ahmoq desa, oliy mahkamada javob beradi. Kimki birodariga telba desa, jahannam olovida javob beradi. **23** Shunday qilib, sen xayr-ehsoningni qurbongohga olib kelganingda, agar u yerda birodaring sendan xafa ekani yodingga tushsa, **24** xayr-ehsoningni u yerda, qurbongoh oldida qoldir va borib, avval birodaring bilan yarashgil. Shundan keyin kelib, xayr-ehsoningni bajo keltir. **25** Sen raqibing bilan qozixonaga borarkansan, yo`l-yo`lakay u bilan kelishishga shoshil, toki raqibing seni qoziga, qozi esa mirshabga topshirib, seni zindonga tashlamasin. **26** Senga chinini aytayin: oxirgi tiyiningni bermaguningcha, u yerdan chiqolmaysan!”

### Zino va ajralish haqida

**27** “Qadimgilarga: “Zino qilma”, - deb aytilganini eshitgansizlar. **28** Lekin Men sizga aytaman: kim bir ayolga shahvat bilan qarasa ham, allaqachon ko`nglida u bilan zino qilgan bo`ladi. **29** Agar sening o`ng ko`zing gunoh qilishingga sabab bo`lsa, uni sug`urib tashla. Chunki butun badaning jahannamga tashlanishidan ko`ra, a`zoyingdan birining nobud bo`lgani sen uchun yaxshiroqdir. **30** Agar sening o`ng qo`ling gunoh qilishingga sabab bo`lsa, uni chopib tashla. Chunki butun badaning jahannamga yo`liqishidan ko`ra, a`zoyingdan birining nobud bo`lgani sen uchun yaxshiroqdir. **31** Yana deyilganki: “Kim xotini bilan ajralmoqchi bo`lsa, unga taloq xatini yozib bersin”. **32** Lekin Men sizga aytaman: kim bevafoqlik aybidan boshqa sabab bilan xotinidan ajralsa, unga zino qilishga sabab topib beradi. Shuningdek, kim ajralgan xotinga uylansa, zino qilgan bo`ladi”.

### Qasam haqida

**33** “Yana qadimgilarga: “Qasamdan qaytma. Ichgan qasamlaringni Xudovand oldida bajo keltir”, - deb aytilganini eshitgansizlar. **34** Lekin Men sizga aytaman: hech qanday qasam ichmanglar - na osmon haqi, chunki u Xudoning taxtidir; **35** na yer haqi, chunki u Xudoning poyandozidir; na Quddus haqi, chunki u Buyuk Podshohning shahridir. **36** Boshing haqi ham qasam ichma, chunki sen bironta sochingni oq yoki



qora qilolmaysan. **37** Sizlarning so`zingiz faqat “ha” yoki “yo`q” bo`lsin. Bundan ortig`i esa shaytonlikdir”.

### Qarimta va qasos haqida

**38** “Sizlar: “Ko`z evaziga ko`z, tish evaziga tish”, - deb aytilganini eshitgansizlar. **39** Lekin Men sizga aytaman: yomonga qarshi chiqma. Kim sening o`ng chakkangga ursa, unga ikkinchisini ham o`gir. **40** Kim sen bilan da`volashib, ko`ylagingni olmoqchi bo`lsa, unga to`ningni ham berib yubor. **41** Kim seni bir chaqirim yo`l yurishga majbur qilsa, u bilan ikki chaqirim yur. **42** Sendan so`raganga ber, sendan qarz olmoqchi bo`lgandan yuz o`girma”.

### Dushmanlaringizni sevinglar

**43** “Yana: “Qardoshingni sevgin, dushmaningdan nafratlan”, - deb aytilganini eshitgansizlar. **44** Lekin Men sizga aytaman: dushmanlaringizni sevinglar. Sizni la`natlaganlarni duo qilinglar. Sizdan nafratlanganlarga yaxshilik qiling. Sizning nomingizga isnod keltirganlar uchun, sizga jabr-zulm o`tkazganlar uchun ibodat qilinglar. **45** Shunda siz osmondagi Otangizning o`g`illari bo`lasizlar. Chunki U O`z quyoshini yovuzlar ustida ham, yaxshilar ustida ham balqitadi, yomg`irini solihlar ustiga ham, fosiqlar ustiga ham yog`diradi. **46** Agar sizni sevadiganlarnigina sevsangiz, bundan sizga rahmat bo`lurmi? Soliqchilar ham xuddi shunday qilishmaydimi? **47** Agar siz faqat birodarlaringiz bilangina salomlashsangiz, qanday fazilatli ish qilgan bo`lasizlar? Butparastlar ham xuddi shunday qilishmaydimi? **48** Shunday qilib, osmondagi Otangiz barkamol bo`lgani kabi, siz ham barkamol bo`linglar”.

### Sadaqa haqida

**6:1** “Ehtiyot bo`linglar, savobli ishingizni odamlarga ko`rinish uchun hammaning ko`z o`ngida qilmanglar. Aks holda osmondagi Otangizdan mukofot ololmaysizlar. **2** Shunday qilib, sen birovga sadaqa bermoqchi bo`lsang, o`tgan-ketganga jar solma. Ikkiyuzlamachilargina odamlardan olqish olish uchun ibodatxonalarda va ko`cha-ko`yda shunday qiladilar.

Sizlarga chinini aytayin: bular o`zlariga yarasha mukofotni olib bo`ldilar. **3** Sen sadaqa berayotganingda, chap qo`ling o`ng qo`ling nima qilayotganini bilmasin. **4** Ya ni sening muruvvating yashirin bo`lsin. Shunda yashirin bo`lganlarni ko`ruvchi Otang seni aniq taqdirlaydi”.

### Ibodat haqida

**5** “Ibodat qilayotganingizda, odamlarga ko`rinish uchun ibodatxonalarda va ko`cha burchaklarida turib ibodat qilishni yaxshi ko`radigan ikkiyuzlamachilarga o`xshamanglar. Sizlarga chinini aytayin: ular o`zlariga yarashasini olib bo`ldilar. **6** Sen esa ibodat qilayotganingda o`z hujrangga kir va eshikni berkitib, yashirin bo`lgan Otangga ibodat qil. Shunda yashirin bo`lganlarni ko`ruvchi Otang seni aniq taqdirlaydi. **7** Ibodat qilayotganingizda, majusiylar kabi ortiqcha so`zlarni takrorlab turmanglar. Ular: ko`p so`zlasam, ibodatim ijobat bo`ladi, deb o`ylaydilar. **8** Ularga o`xshamanglar, chunki Otangiz nimalarga muhtojligingizni Undan so`rashingizdan oldin biladi. **9** Sizlar esa bunday ibodat qilinglar: Bizning osmondagi Otamiz! Sening muqaddas isming ulug`lansin. **10** Sening Shohliging kelsin. Osmonda bo`lgani kabi, Yerda ham Sening irodang bajo kelsin. **11** Bugungi rizq-ro`zimizni bergin. **12** Bizga gunoh qilganlarni biz kechirgandek, Sen ham bizning gunohlarimizni kechirgin. **13** Bizni vasvasaga duchor qilmagin, Ammo yovuz shaytondan xalos qilgin. Saltanat, kuch-qudrat va shon-shuhrat to abad Senikidir. Omin. **14** Agar siz boshqalarning ayb-gunohlarini kechirsangizlar, samoviy Otangiz ham sizni kechiradi. **15** Biroq, agar siz boshqalarning ayb-gunohlarini kechirmasangizlar, Otangiz ham sizni kechirmaydi”.

### Ro`za haqida

**16** “Ro`za tutayotganingizda, ikkiyuzlamachilar kabi qovoq osiltirib yurmanglar. Ular ro`za ekanlarini odamlarga bildirish uchun o`zlarini avzoyi buzuq qilib ko`rsatadilar. Sizlarga chinini aytayin: ular o`zlariga yarashasini olib bo`ldilar. **17** Lekin sen ro`za tutganingda, o`zingni yuvib-tarab yurgin, **18** toki ro`za tutganing insonlarga emas, balki yashirin bo`lgan Otangga oshkor bo`lsin. Yashirin bo`lganlarni ko`ruvchi Otang

esa seni aniq taqdirlaydi”. Samoviy xazinalar haqida **19** “Bu dunyoda kuya va zang yeb ketadigan hamda o`g`ri teshib talaydigan xazinalarni jamlamanglar. **20** Aksincha, kuya va zang yeb ketmaydigan, o`g`ri teshib talamaydigan u dunyoning xazinalarini jamlanglar. **21** Xazinangiz qayerda bo`lsa, yuragingiz ham o`sha yerda bo`lur. **22** Ko`z - tanning chirog`idir. Agar sening ko`zing tiniq bo`lsa, butun taning ham yorug` bo`lur. **23** Ammo ko`zing yomon bo`lsa, butun taning ham qorong`i bo`lur. Agarda ichingdagi nur qorong`i bo`lib tursa, u qorong`ilik qanchalik qo`rqinchli bo`lur! **24** Hech kim ikki xo`jayinga xizmat qilolmaydi. U yo birini yomon ko`rib, boshqasini sevadi, yoki biriga ixlos qo`yib, boshqasini xorlaydi. Siz ham Xudoga, ham pulga birdek sig`ina olmaysizlar”.

### Tirikchilik tashvishlari haqida

**25** “Binobarin, sizga shuni aytaman: nima yeb, nima ichamiz, deb joningiz uchun, nima kiyamiz, deb taningiz uchun tashvishlanib yurmanglar. Jon ovqatdan, tan esa kiyimdan afzal emasmi? **26** Ko`kda uchuvchi qushlarga qaranglar: ular na ekadi, na o`radi, na omborga don yig`adi. Shunga qaramay, samoviy Otangiz ularning rizqini beradi. Siz esa ulardan ancha a loroq emasmisiz? **27** Sizlardan kim tashvishlanib, o`z umrini bir lahza bo`lsin uzaytira olar ekan? **28** Nega kiyim uchun tashvishlanasizlar? Dashtdagi piyozgullarning qanday o`shishiga qarab, ibrat olinglar: ular na mehnat qilar, na charx yigirar. **29** Ammo sizlarga aytib qo`yay: hatto podshoh Sulaymon ham o`zining shuhrat cho`qqisida bularning hech biriday kiyinmagan edi. **30** Agar Xudo bugun bor bo`lib, ertaga o`choqqa otiladigan dasht o`tiga shunday zeb bergan bo`lsa, sizni undan kam ko`rarmidi, ey imoni sustlar?! **31** Shunday ekan, nima yeymiz, nima ichamiz, nima kiyamiz, deb tashvishlanib yurmanglar. **32** Majusiylar hadeb bularning g`amida yurishadi. Lekin samoviy Otangiz siz bularning bariga muhtoj ekaningizni biladi-ku! **33** Siz avvalo Xudoning Shohligi va Uning irodasi payidan bo`linglar, shunda bularning hammasi sizga qo`shimcha qilib beriladi. **34** Binobarin, ertagi kun haqida tashvish tortmanglar. Ertaning tashvishi ertaning o`ziga tegishlidir. Har bir kunning dardi o`ziga yetar”.

## Boshqalarni hukm qilmanglar

**7:1** “Boshqalarni hukm qilmanglar, siz ham mahkum bo`lmaysiz. **2** Sizlar qanday hukm qilsangiz, sizga ham shunday hukm o`tkaziladi. Sizlar qanday o`lchov bilan o`lchasangiz, sizga ham shunday o`lchov tatbiq etiladi. **3** Nega sen birodaring ko`zidagi cho`pni ko`rasanu, lekin o`z ko`zingdagi xodani sezmayсан? **4** Sening ko`zingda xoda bor ekan, qanday qilib birodaringga: “Kel, ko`zingdagi cho`pni chiqarib olay”, - deysan? **5** Ey ikkiyuzlamachi! Oldin o`z ko`zingdan xodani chiqarib ol, keyin birodaring ko`zidan cho`pni qanday chiqarmoq uchun ko`zing ochiladi. **6** Muqaddas bo`lgan narsani itlarga bermang, marvaridlaringizni cho`chqalar oldiga tashlamang. Tag`in bularni oyoq-osti qilib, so`ngra o`zingizni tilka-pora qilmasinlar!”

## Xudodan so`ranglar

**7** “So`rab turing, sizga beriladi. Izlab turing, topasizlar. Taqillatib turing, sizga ochiladi. **8** Chunki har bir so`ragan olar, izlagan topar, taqillatganga eshik ochilar. **9** Orangizda bir kimsa bormi, o`g`li undan non so`raganda, unga tosh bersa? **10** Yoki baliq so`raganda, unga ilon bersa? **11** Sizlar yovuz bo`la turib, bolalaringizga yaxshi hadyalar berishni bilsangiz, boz ustiga osmondagi Otangiz Undan so`raganlarga mo`l-ko`l ne ímatni beradi! **12** Odamlar sizga qanday muomala qilishlarini istasangiz, siz ham ularga shunday muomalada bo`ling. Tavrot va payg`ambarlar ta`limotining mag`zi shundadir”.

## Najot eshigi tor

**13** “Tor eshikdan kiringlar! Chunki halokatga eltuvchi yo`l ko`p enli, darvozasi esa kengdir. Ana, shu tomon yurayotganlar ko`p. **14** Hayot sari eltuvchi yo`l esa tang, eshigi juda tordir. Bu yo`lni topadiganlar oz”.

## Daraxt va uning mevasi

**15** “Soxta payg`ambarlardan ehtiyot bo`linglar! Ular sizning oldingizga qo`y kiyimida keladilar, lekin ichlaridan yirtqich bo`rilardir. **16** Ularni

mevalaridan bilib olasizlar. Tikanakdan uzum, yoki yantoqdan anjir terisharmikan? **17** Har bir yaxshi daraxt yaxshi meva berar, yomon daraxt esa yomon meva berar. **18** Yaxshi daraxt yomon meva berolmas, yomon daraxt ham yaxshi meva berolmas. **19** Yaxshi meva bermaydigan har bir daraxt esa kesilib, olovga tashlanadi. **20** Shunday qilib, soxta payg`ambarlarni mevalaridan bilib olasizlar. **21** Meni “Yo Rabbiy, yo Rabbiy” deb chaqirgani bilan har bir odam Osmon Shohligiga kiravermaydi. Bunga osmondagi Otamning irodasini bajo keltiruvchigina erishadi. **22** Qiyomat kunida ko`plar Menga: “Yo Rabbiy, yo Rabbiy, bizlar Sening noming bilan bashorat qilmadikmi? Sening noming bilan jinlarni quvib chiqarmadikmi? Sening noming bilan ko`pgina mo`jizalar yaratmadikmi?” - deydilar. **23** O`sha vaqtda Men ularning yuziga qarab: Men sizlarni hech qachon tanigan emasman. Ey badkirdorlar, Mening oldimdan ketinglar! - deyman”.

### Sog`lom va chirik negiz

**24** “Endi kim Mening bu so`zlarimni eshitib, ularni bajo keltirsa, uni o`z uyini tosh ustiga qurgan farosatli odamga o`xshataman. **25** Yomg`ir yog`ib, sellar toshib, shamollar esib, u uyni bosib qolibdi. Lekin tosh ustiga o`rnatilgani uchun qulamabdi. **26** Biroq kim Mening bu so`zlarimni eshitib, ularni bajo keltirmasa, o`z uyini qum ustiga qurgan farosatsiz odamga o`xshaydi. **27** Yomg`ir yog`ib, sellar toshib, shamollar esib, u uyni bosib qolibdi. Uy esa qulab, yer bilan yakson bo`libdi”. **28** Iso bu so`zlarni aytib bo`lgandan keyin, xaloyiq Uning ta`limotiga hayron qoldi. **29** Chunki Iso ularga ulamolar va farziylar kabi emas, balki qudratli kuch egasiday ta`sirchan ta`lim berar edi.

### Isoning moxovni sog`aytirishi

**8:1** Iso tog`dan tushgach, tumonat xaloyiq Uning orqasidan ergashdi. **2** Shu o`rtada bir moxov Unga yaqinlashib, sajda qildi-da: - Hazrat, agar istasang, meni moxovlikdan pok qila olasan, - dedi. **3** Iso qo`lini uzatdi va unga tegizib: - Istayman, pok bo`l! - dedi. Moxov shu zahoti dardidan forig` bo`ldi. **4** Iso unga: - Ehtiyot bo`l, buni hech kimga aytma. Lekin

borib, o`zingni ruhoniya ko`rsat va sog`ayganingni tasdiqlatgin, Muso payg`ambar buyurgan qurbonlikni keltirib ber, - dedi.

### Rimlik yuzboshining e`tiqodi

**5** Iso Kafarnahum shahriga kirib kelayotganda, bir yuzboshi Uning oldiga keldi va yolvorib: **6** - Hazrat, mening xizmatkorim uyda shol bo`lib g`oyat qiynalib yotibdi, - dedi. **7** Iso unga: - Men borib uni sog`aytiraman, - dedi. **8** Yuzboshi javob berib: - Hazrat! - dedi, - Kulbanga oyoq bosishing uchun men munosib emasman. Sen birgina so`z aytsang, bas, xizmatkorim sog`ayib ketadi. **9** Chunki men ham buyruqqa tobe odamman, shuningdek, mening buyrug`imga bo`ysunuvchi askarlarim ham bor. Biriga “ket” desam, ketadi. Boshqasiga “kel” desam, keladi. Biron xizmatkorimga “shuni qil” desam, qiladi. **10** Iso buni eshitgach hayron qoldi. Orqasidan ergashib kelayotganlarga: - Sizlarga chinini aytayin, - dedi, - Men bunchalik buyuk ishonchni Isroilning biron joyida ham topmadim. **11** Sizlarga shuni aytaman: qiyomatda sharqu g`arbdan ko`plar kelib, Osmon Shohligida Ibrohim, Is`hoq va Yoqub bilan birga ziyofatga o`tirishadi. **12** Lekin Shoh ahlining o`zlari esa tashqi qorong`ilikka otiladilar. U yerda zor yig`lab, tish g`ichirlatadilar. **13** Keyin Iso yuzboshiga: - Bor, sen ishonganingdek bo`lsin, - dedi. Yuzboshining xizmatkori esa o`sha zahoti sog`ayib ketdi.

### Iso ko`p xastalarni sog`aytirishi

**14** Iso Butrusning uyiga kelganda, uning qaynonasi isitmalab yotganini ko`rdi. **15** Iso uning qo`liga tegishi bilan isitmasi tushdi. Ayol esa turib, Unga xizmat qila boshladi. **16** Kech kirishi bilan, jinga chalingan bir talay kishini Isoning oldiga keltirishdi. U so`z bilan yomon ruhlarni quvib chiqardi, dardga yo`liqqanlarning hammasini sog`aytirdi. **17** Shu tariqa Isha`yo payg`ambarga vahiy bo`lgan ushbu oyat bajo keldi: “U bizning kasalliklarimizni ko`tardi, Dardlarimizni esa O`zi chekdi”.

## Isoga ergashishning shartlari

**18** Iso atrofida ko`p xaloyiqni ko`rgach, shogirdlariga narigi tomonga suzib o`tishni buyurdi. **19** Shu vaqtda bir ulamo Unga yaqinlashib: - Ustoz, qayerga borma, men Sening orqangdan yuraman, - dedi. **20** Iso unga: - Tulkilarning inlari bor, osmon qushlarining uyalari bor. Lekin Inson O`g`lining bosh suqadigan joyi yo`q, - dedi. **21** Shogirdlardan boshqa biri Isoga: - Hazrat, oldin borib otamni ko`mib kelishimga ijozat ber, - dedi. **22** Lekin Iso unga: - Sen Mening orqamdan yur. O`liklarni qo`y, ularni o`zicha o`lik bo`lganlar ko`msin, - dedi.

## Isoning to`fonni tinchitishi

**23** Iso qayiqqa tushganda, Uning ketidan shogirdlari ham tushishdi. **24** Qo`qqisdan ko`lda kuchli to`fon ko`tarildi, qayiq to`lqinlar og`ushida qoldi. Iso esa uyquda edi. **25** Shogirdlari Uning yoniga bordi-da, Uni uyg`otishib: - Yo Rabbiy, bizlarni qutqar, halok bo`lyapmiz! - deyishdi. **26** Iso ularga: - Hoy imoni sustlar, buncha qo`rqqoq bo`lmasangiz?! - dedi. So`ng turib, shamolga va ko`lga do`q urdi. Shu zahoti chuqur sukunat cho`kdi. **27** Odamlar esa bir-biriga: - Bu qanaqa kishiki, shamol ham, ko`l ham Unga bo`ysunsa? - deb hayratlanishdi.

## Jin urgan ikki odamning qutulishi

**28** Iso narigi qirg`oqqa, Gergesa yurtiga yetib kelganida, qabriston lahadlaridan chiqib kelgan, jinga chalingan ikki kishi Unga ro`baro` bo`ldi. Ular juda vahshiy bo`lganliklari uchun, hech kim bu yo`ldan o`tolmas edi. **29** Ular shunday baqira boshlashdi: - Ey Xudoning O`g`li Iso, bizda nima ishing bor? Bu yerga bizlarni vaqtdan oldin qiynagani keldingmi? **30** Ulardan uzoqroqda katta to`ng`iz podasi o`tlab yurgan edi. **31** Jinlar Isoga yolvorib: - Agar bizlarni quvib chiqaradigan bo`lsang, unda to`ng`iz podasiga yuborgin, - deyishdi. **32** Iso ularga: - Boringlar! - deyishi bilanoq, ular odamlardan chiqib ketib, to`ng`iz podasiga kirib oldilar. Shu onda butun to`ng`iz podasi tik qiyalikdan ko`l tomon yopirilib, suvda nobud bo`ldi. **33** To`ng`iz boquvchilar esa qochib shaharga borishdi va yuz bergan hamma hodisani, shuningdek, jinga

chalinganlar bilan bo`lib-o`tgan voqeani gapirib berishdi. **34** Shunda butun shahar aholisi Isoning qarshisiga chiqdi. Uni ko`rgach, yurtlari hududidan chiqib ketishini iltimos qilishdi.

### Isoning sholni sog`aytirishi

**9:1** Shundan keyin Iso qayiqqa tushib, ko`lning berigi tomoniga qaytib suzib o`tdi. U O`z shahri - Kafarnahunga kirib kelgan zahoti **2** Uning oldiga to`shakda yotgan bir shol odamni ko`tarib keldilar. Iso ularning ishonchini ko`rib, sholga: - Dadil bo`l, bolam, gunohlaring kechirildi, - dedi. **3** Shunda ulamolardan ba`zilari o`zlaricha: “Bu kufalik qilyapti-ku!” - deyishdi. **4** Iso esa ularning mulohazalarini payqab, dedi: - Nega sizlar ko`ngillaringizdan yomon fikrlarni o`tkazyapsiz? **5** “Gunohlaring kechirildi”, - deb aytish osonroqmi, yoki: “O`rningdan turib yura qol”, - deb aytishmi? **6** Lekin Inson O`g`lining yer yuzida gunohlarni kechirish qudrati borligini ham bilib qo`yinglar. Shundan so`ng Iso sholga qayrilib: - O`rningdan tur, to`shagingni olib uyingga ket! - dedi. **7** Shol esa o`rnidan turdi-da, to`shagini olib o`z uyiga ravona bo`ldi. **8** Bu voqeani ko`rgan xaloyiq o`ta hayron bo`lib, insonlarga bunday qudrat bergan Xudoni olqishladi.

### Isoning Mattoni chaqirishi

**9** Iso u yerdan o`tayotganda, soliq yig`adigan joyda o`tirgan Matto ismli odamni ko`rib qoldi-da, unga: - Mening orqamdan yur! - dedi. U esa o`rnidan qalqib, Isoning orqasidan yurdi. **10** Iso uyda yeb-ichib o`tirar ekan, ko`pgina soliqchilar va har xil gunohkor kishilar ham kelib, dasturxon atrofida Iso bilan shogirdlariga qo`shilishdi. **11** Farziylar buni ko`rib, Isoning shogirdlaridan: - Nega Ustozingiz soliqchilaru gunohkorlar bilan birga yeb-ichib o`tiribdi? - deb so`radilar. **12** Iso buni eshitgach, ularga dedi: - Sog`lar emas, bemorlar tabibga muhtojdir. **13** Yaxshisi sizlar borib, Tavrotdagi: “Men qurbon emas, rahm-shafqat istayman”, degan oyatning ma`nosini o`rganib olinglar. Chunki Men taqvodorlarni emas, balki gunohkorlarni tavbaga chaqirgani kelganman.



## Ro`za tutish haqida savol

**14** U vaqt Yahyoning shogirdlari Isoning oldiga kelib so`radilar: - Bizlar va farziylar ko`p ro`za tutamiz-u, Sening shogirdlaring-chi, nega tutmaydilar? **15** Iso ularga dedi: - Kuyov davrada bo`lgan vaqtda to`y ahli aza tutarmikin? Biroq kuyov ulardan judo bo`lgan kunlar keladi, ana o`shanda ro`za tutadilar. **16** Hech kim eski kiyimga yangi matodan yamoq solmaydi. Chunki yangi yamoq eski kiyimdan so`kilib, kiyimni battar sitib yuboradi. **17** Shuningdek, yangi sharobni ham eski meshga quymaydilar. Chunki eskining tagi tushadi, sharob to`kiladi va mesh ham nobud bo`ladi. Aksincha, yangi sharobni yangi meshga quyadilar, u ham, bu ham saqlab qolinadi.

## Tirilgan qiz, sog`aygan ayol

**18** Iso ularga bu so`zlarni aytib turganda, qaysi bir jamoaboshi kelib, Isoga ta`zim qildi-da: - Mening qizim hozir o`ldi. Biroq Sen kelib unga qo`lingni tekizsang, u yana tirilib ketadi, - dedi. **19** Iso o`rnidan turib, shogirdlari bilan u odamning orqasidan bordi. **20** Shu payt o`n ikki yildan beri qon ketishidan qiynalib yurgan bir ayol Isoga orqa tomondan yo`lab, kiyimining etagiga qo`l tegizdi. **21** U o`zicha: "Agar kiyimiga bir tegib olsam bas, sog`ayib ketaman", - deb o`ylagan edi. **22** Iso orqasiga o`girilib, ayolni ko`rgach: - Dadil bo`l, qizim, ishonching seni qutqardi, - dedi. Ayol shu zahoti dardidan xalos bo`ldi. **23** Iso boshliqning uyiga yetib, nay chaluvchilarni va qiy-chuv qilayotgan olomonni ko`rgach: **24** - Bu yerdan tashqariga chiqinglar! Qizcha o`lgan emas, uxlab yotibdi, - dedi. Ular esa Uning ustidan kulishdi. **25** Olomon tashqariga chiqarilgandan so`ng Iso ichkariga kirib, qizchaning qo`lidan ushladi. Qizcha esa o`rnidan turib ketdi. **26** Bu hodisa xabari mamlakat bo`ylab ovoza bo`ldi.

## Ikki ko`r va bir soqovni sog`aytirish

**27** Iso u yerdan jo`nab ketayotganda, ikki ko`r Uning orqasidan ergashgancha dod solib: - Ey Dovud O`g`li Iso, bizlarga rahm qil! - deb faryod chekishardi. **28** Iso uyga qaytganda, ko`rlar Uning yoniga kelishdi.

Iso ulardan so`radi: - Men xohishingizni bajo qilishga kuchim borligiga ishonasizlarmi? - Ishonamiz, Hazrat! - deb javob berishdi ular. **29** Shunda Iso ularning ko`zlariga tegib: - Sizing ishonchingizga yarasha bo`lsin, - dedi. **30** Shu bilan ularning ko`zlari ochilib ketdi. - Buni hech kim bilmasin, tag`in! - deb Iso ularga qattiq tayinladi. **31** Ular esa u yerdan chiqiboq, butun mamlakat bo`ylab U haqda ovoza tarqatib yuradigan bo`lishdi. **32** U kishilar endi chiqib borayotganda, jin chalgan bir soqovni Isoning oldiga keltirishdi. **33** Iso jinni quvib chiqargandan keyin, soqov gapira boshladi. Xalq esa hayratda qolib: - Isroilda bunday hodisa hech qachon bo`lgan emas, - dedi. **34** Bunga farziylar: - U jinlar boshlig`ining kuchi bilan jinlarni quvib chiqaryapti-ku, - deb g`ingshidilar.

### Hosil mo`l, yumushchilar oz

**35** Iso hamma shahar-qishloqlarni aylanadigan bo`ldi. Mahalliy ibodatxonalarda ta`lim berib, Xudoning Shohligi to`g`risidagi Xushxabarni e`lon qilar va odamlarning har xil dardu darmonsizliklarini davolar edi. **36** Xalq olomonini ko`rib, Iso ularga achindi; chunki cho`ponsiz qo`ylarday dovdiragan va holdan toygan edilar. **37** O`sha vaqtda Iso O`z shogirdlariga dedi: “Hosil mo`l, biroq yumushchilar oz. **38** O`z hosilingni yig`ib-teradigan yumushchilar yubor, deb hosil Egasiga iltijo qilinglar”.

### O`n ikki shogirdni tanlab xizmatga yuborish

**10:1** Iso O`zining o`n ikki shogirdini yoniga chaqirib, odamlardan yomon ruhlarni quvib chiqarish va har qanday dardu illatni sog`aytirish uchun ularga qudrat ato etdi. **2** Ushbu o`n ikki havoriyning ismlari esa quyidagicha: birinchisi Butrus deb atalgan Simun va uning ukasi Idris, keyin Zabadiyning o`g`illari Yoqub bilan ukasi Yuhanno, **3** Filip, Bartolmey, To`ma, soliqchi Matto, Alfeyning o`g`li Yoqub va Taddey deb atalgan Leviy, **4** vatanparvar Simun hamda Isoning xoini Yahudo Ishqariyot. **5** Iso bu o`n ikkovini jo`natib, buyruq berdi: “Majusiylar yo`liga oyoq bosmanglar va samariyaliklarning biron shahriga kirmanglar. **6** Aksincha, adashgan qo`ylarga o`xshagan Isroil xalqi oldiga boringlar. **7**

Yo`lingiz qayga tushmasin, elga: “Osmon Shohligi yaqinlab qoldi”, - deb e`lon qilinglar. **8** Xastalarni sog`aytiringlar, moxovlarni pok qilinglar, o`liklarni tiriltiringlar, jinlarni quvib chiqaringlar. Tekin oldingizlar, tekin beringlar. **9** Belbog`laringizga oltin, kumush yoki mis pul ham tugmanglar. **10** Yo`l uchun na to`rva, na bir juft ko`ylak, na choriq va na hasa olinglar. Chunki mehnatkash o`zining non-nasibasiga munosibdir. **11** Qaysi shahar yoki qishloqqa kirsangiz, u yerda o`zingizga munosiblarnigina yo`qlab boring va jo`naguningizcha o`sha yerda qolinglar. **12** Uyga kirayotganingizda uy ahliga salom beringlar. **13** Agar u uy ahli niyatingizga munosib bo`lsa, ularning boshi salomat bo`ladi. Agarda munosib bo`lmasa, salomingiz sizga qaytib keladi. **14** Agar kim sizni qabul qilmasa va so`zlaringizga quloq solmasa, u uydin yoki shahardan chiqib ketayotganingizda oyoqlaringizdan changni ham qoqib ketinglar. **15** Sizga chinini aytayin: qiyomat kunida bunday shahardan ko`ra Sado`m va G`amo`ra yerining ahvoli yengilroq bo`ladi”.

### Kelajak qayg`ular va quvg`inlar

**16** “Mana, Men sizlarni bo`rilarning orasiga qo`ylar kabi yuboryapman. Siz ilonday ziyrak, kaptarday sodda bo`linglar. **17** Insonlardan ehtiyot bo`linglar; chunki sizlarni adliyaga topshirib, ibodatxonalarda kaltaklaydilar. **18** Mening nomim uchun sizlarni hokimlar va podshohlar qoshiga olib boradilar, siz esa ular va turli xalqlar oldida Mening guvohlarim bo`lasizlar. **19** Sizni tutib berishayotganda esa nimani aytamiz, qanday gapiramiz, deb o`ylab qayg`urmanglar. Nima aytishingiz kerakligi o`sha onda sizlarga uqtiriladi. **20** Chunki o`zlaringiz emas, ichingizdagi Otangizning Ruhi gapiradi. **21** Aka ukasini, ota o`g`lini o`limga topshiradi. Bolalar o`z ota-onalariga qarshi chiqib, ularni o`ldirtiradilar. **22** Mening nomim tufayli hamma sizlardan nafratlanadi. Lekin oxirigacha chidagan qutuladi. **23** Agar sizlarni bir shahardan quvsalar, boshqasiga qochib o`tinglar. Sizlarga chinini aytayin: sizlar Isroilning shaharlarini aylanib chiqishga ulgurmasingizdan, Inson O`g`li yer yuziga qaytib keladi. **24** Shogird o`zining ustozidan yuqori bo`lmas, xizmatkor o`zining xo`jayinidan yuqori bo`lmas. **25** Shogirdga o`zining ustoziday,

xizmatkorga o`zining xo`jayiniday bo`lsa kifoyadir. Agar uy egasiga iblis deb nom qo`yishgan bo`lsa, unda uy ahlini yana nimalar deyishmaydi!”

### Qo`rqish va qo`rqmaslik haqida

**26** “Shunday qilib, ulardan qo`rqmanglar! Chunki ochilmay qoladigan hech qanday yashirin narsa yo`q, ma lum bo`lmaydigan hech qanday sir ham yo`qdir. **27** Sizga qorong`ilikda gapirayotganlarimni yorug`likda aytaveringlar. Qulog`ingizga shivirlab aytilayotganlarni tomlarning ustidan e lon qilaveringlar. **28** Tanni o`ldirib, jonni esa o`ldira olmaydiganlardan qo`rqmanglar. Yaxshisi, jonni ham, tanni ham jahannamda halok etishga qodir bo`lgan Xudodan qo`rqinglar. **29** Ikkita chumchuq bir tangaga sotilmaydimi? Ammo Otangiz rozi bo`lmasdan, ularning bittasi ham yerga tushmaydi. **30** Sizlarga kelganda, boshingizdagi sochlarning hammasi ham sanalgandir. **31** Shuning uchun qo`rqmanglar, sizlar talay chumchuqlardan ko`ra qadrliroqsiz”.

### Isoga loyiq bo`lish haqida

**32** “Kimda-kim insonlar oldida Meni tan olsa, Men ham osmondagi Otamning oldida uni tan olaman. **33** Biroq, kim insonlar oldida Meni inkor etsa, Men ham osmondagi Otamning oldida uni inkor etaman. **34** Meni yer yuziga tinchlik keltirish uchun kelgan, deb o`ylamanglar. Men tinchlik emas, balki qilich keltirgani kelganman. **35** Odamni otasidan, qizni onasidan, kelinni qaynonasidan ajratish uchun kelganman. **36** Odamning dushmanlari o`z uyidagilar bo`ladi. **37** Ota yoki onasini Mendan ortiq sevgan Menga loyiq emas. O`g`li yoki qizini Mendan ortiq sevgan Menga loyiq emas. **38** Kimki o`z xochini olib, ortimdan ergashmasa, Menga loyiq emas. **39** O`z jonini ayamoqchi bo`lgan uni yo`qotadi. Men uchun jonini yo`qotgan esa jon topadi. **40** Sizni qabul qilgan Meni qabul qiladi. Meni qabul qilgan esa Meni Yuborganni qabul qilgan bo`ladi. **41** Kim payg`ambarni payg`ambar deb qabul qilsa, u payg`ambarga yarasha ehson oladi. Kim solihni solih deb qabul qilsa, u solihga yarasha ehson oladi. **42** Kimki shogirdlik hurmati deb, bularning hatto eng kichigiga bir piyola

sovuq suvgina ichirsa ham, chindan sizlarga aytamanki, u ehsoniga sazovor bo`lur”.

## Iso Masih va Yahyo payg`ambar

**11:1** Iso o`n ikki shogirdiga ushbularni buyurib bo`lgach, yaqin shaharlarda ta`lim berish va voizlik qilish uchun u yerdan jo`nadi. **2** Zindonda yotgan Yahyo esa Masihning qilayotgan ishlarini eshitgach, o`z shogirdlaridan ikkitasini Uning oldiga yuborib: **3** “Keladigan Qutqaruvchi Senmisan, yoki biz boshqasini kutaylikmi?” - deb Undan so`ratdi. **4** Iso javob berib ularga dedi: “Boringlar, eshitib ko`rayotganlaringizni Yahyoga bildiringlar: **5** Ko`rlar ko`ryapti, cho`loqlar yuryapti, moxovlar tuzalyapti, karlar eshityapti, o`liklar tirilyapti va bechoralarga Xushxabar e`lon qilinyapti. **6** Meni deb vasvasaga tushmagan baxtlidir!” **7** Yahyoning shogirdlari jo`nayotgan paytda, Iso xaloyiqqa Yahyo haqida gapira boshladi: “Nima ko`rgani sahroga bordingizlar? Shamolda hilpirab turgan qamishnimi? **8** Axir, nima ko`rgani chiqdingizlar? Nafis kiyim kiygan odamnimi? Nafis kiyinganlar podshoh saroylarida bo`ladi-ku! **9** Axir, nima ko`rgani chiqdingizlar? Payg`ambarnimi? Ha, sizga aytamanki, payg`ambardan ham ulug` bo`lganni ko`rdingizlar. **10** Bu kishi Tavrotda yozilganning xuddi o`zi: “Men Sendan avval elchimni yuborarman, U Sening oldingda yo`l hozirlab yurar”. **11** Sizlarga chinini aytayin: ayol zotidan tug`ilganlar orasida Yahyo payg`ambardan buyugi chiqqan emas. Shunga qaramay, Osmon Shohligida hatto eng kichik hisoblangan ham undan kattadir. **12** Yahyo payg`ambar maydonga kelgan kunlardan to hozirgacha Osmon Shohligiga tajovuz qilib kelmoqdalar; tajovuzkorlar dastasi uni bosib olishga zo`r bermoqda. **13** Ma`lumki, Yahyogacha o`tgan barcha payg`ambarlar va shuningdek, Tavrot bitiklari bo`lg`usi hodisalar haqida oldindan darak berib kelgan. **14** Endi qabul qilishni istasangizlar, qaytib kelishi muqarrar bo`lgan Ilyos payg`ambar xuddi Yahyoning o`zidir. **15** Kimning eshitar qulog`i bo`lsa, eshitsin! **16** Endi bu naslni kimga o`xshatay? Bu nasl - maydonda o`tirib, bir-biriga: **17** “Senlarga nay chaldik, o`ynamadinglar, Senlarga yig`i chiqardik, dodlamadinglar”,? deb qichqirishadigan bolalarga o`xshaydi. **18** Chunki Yahyo kelib, yemadi-ichmadi va uni “jin uribdi” deyaptilar. **19** Inson O`g`li kelib, yedi ham,

ichdi ham va bu gal: “Ana kabobxo`ru sharobxo`r odamni ko`ringlar, U soliqchilar va gunohkorlarning do`sti ekan!” - deyishmoqda. Va lekin ilohiy hikmat unga rioya qiluvchilar orqali tasdiqlanadi”.

### Gunohkor shaharlarning holiga voy

**20** Shu vaqt Iso mo`jizalarining aksari namoyon bo`lgan shaharlarga, tavba-tazarru qilmaganliklari uchun ta`na qila boshladi: **21** “Sening holingga voy, ey Horazin! Sening holingga voy, ey Baytsayda! Chunki sizlarda sodir bo`lgan mo`jizalar Tir va Sido`n shaharlarida ro`y berganda edi, ular allaqachon julga o`ranib, kulga surkanib, tavba-tazarru qilgan bo`lardilar. **22** Biroq sizlarga aytib qo`yay: qiyomat kunida sizdan ko`ra Tir va Sido`nning holi yengilroq bo`ladi. **23** Yo sen, ey ko`kkacha yuksaluvchi Kafarnahum! Sen tamug`gacha tushib ketursan. Chunki senda sodir bo`lgan mo`jizalar Sado`m yerida sodir bo`lganda edi, u yer shu kungacha saqlanib qolgan bo`lar edi. **24** Biroq sizlarga aytib qo`yay: qiyomat kunida sendan ko`ra Sado`m yerining ahvoli yengilroq bo`ladi”.

### Horib-tolganlarga xushxabar

**25** O`sha vaqtda Iso so`zini davom ettirib dedi: “Ey Ota, yeru ko`k Hukmroni! Sen bu ishlarni donoyu oqillardan yashirib, go`daklarga ma`lum etganing uchun Senga hamdu sanolar aytaman. **26** Ha Ota, Sening ezgu xohishing shunday edi. **27** Otam Menga hamma narsani topshirgan. Otadan boshqa hech kim O`g`ilni bilmas. O`g`ildan boshqa hamda O`g`il bilim berishni istagandan boshqa hech kim Otani bilmas. **28** Ey og`ir yuk ostida qiynalib, horib-tolgan hammalaringiz! Mening huzurimga keling, Men sizga orom beraman. **29** Mening bo`yinturug`imga o`zingizni qo`shing va Mendan o`rganinglar. Chunki Men beozor va soddadilman. Shunday qilib, jonlaringiz taskin topar. **30** Chunki Men solgan bo`yinturuq yumshoq, Men bergan yuk yengildir”.

### Dam olish kuniga rioya qilish haqida

**12:1** O`sha kezlar bir shanba kuni Iso ekinzordan o`tib borayotgan edi. Uning shogirdlari och bo`lganidan, boshoqlarni uzib yeya boshlashdi. **2**

Farziylar buni ko`rib, Isoga: - Ana, Sening shogirdlaring dam olish kunida qilish mumkin bo`lmagan ishni qilyaptilar! - deyishdi. **3** - Nahotki sizlar Dovud va uning och qolgan hamrohlari nimalar qilganini o`qimagan bo`lsangiz? - dedi ularga Iso. **4** - Dovud Xudoning uyiga kirib, o`zi va yonidagilarga ham taqiqlangan, faqat ruhoniylargina yeyishi mumkin bo`lgan baxshida nonlarni yegan edi. **5** Yoki ma`baddagi ruhoniylar shanba kungi dam olish amrini buzsalar-da, gunohkor bo`lmasliklarini Tavrotda o`qimagansizmi? **6** Biroq Men sizlarga aytayinki, bu yerdagi Kimsa ma`baddan ham ulug`dir. **7** Agar sizlar Tavrotdagi: “Men qurbon emas, rahm-shafqat istayman” degan oyatga tushunganingizda, begunohlarni hukm qilmas edingizlar. **8** Chunki Inson O`g`li dam olish kunining ham hokimidir. **9** Iso u joydan nariga o`tib, yahudiy ibodatxonasiga kirdi. **10** U yerda qo`li shol bo`lib qolgan bir odam bor edi. Isoni ayblash maqsadida Uni so`roq qilishdi: - Shanba kunida kasalni davolash mumkinmi? **11** Iso ularga aytdi: - Sizdan qay biringiz bir qo`yi bo`laturib, agar qo`y shanba kuni chuqurga tushib ketsa, uni tortib chiqarmaydi? **12** Inson esa qo`ydan qanchalar ulug`! Shunga ko`ra, shanba kunida yaxshilik qilish mumkin. **13** Shunday qilib, Iso u odamga: - Qo`lingni uzat! - dedi. U esa uzatishi bilanoq, bu qo`li boshqa qo`liday soppa-sog` bo`ldi-qoldi. **14** Farziylar esa shu zahot tashqariga chiqib, Isoni yo`q qilishga til biriktirdilar. Iso buni bilib, u yerni tark etdi.

## Ulug` Xaloskor Iso

**15** Tumonat xaloyiq Isoning ketidan ergashdi, U esa hamma kasallarini sog`aytirdi. **16** O`zini oshkor etmoqni ularga qat`iy man qildi. **17** Shu bilan Isha`yo payg`ambarga kelgan quyidagi Xudo kalomi bajo bo`ldi: **18** “Mana, Mening tanlagan O`g`lonim, Mahbubim, ko`nglim Unga nisor! Men O`z Ruhimni Unga berarman, U esa elga adl e`lon etgay. **19** U talashmas, tortishmas ham, Ko`cha-ko`yda sira baqirmas. **20** Sindirmagay bukik qamishni, O`chirmagay tutayotgan pilikni-da, To adlu insofni o`rniga qo`yguncha. **21** Ellar esa Uning ismiga umid bog`lar”.

## Iso va shayton

**22** Shundan so`ng Isoning oldiga jinga chalinib ko`r va soqov bo`lgan kishini keltirishdi. Isoning shifolashi tufayli uning tili ham chiqdi, ko`zi ham ochildi. **23** Bundan butun xaloyiq hayratlanib: “Bu Dovudning O`g`li - Masih emasmikan?” - dedi. **24** Farziylar buni eshitishgach: “U ins-jinlarning boshlig`i - iblisning kuchi bilangina jinlarni quvib chiqaryaptiku”, - dedilar. **25** Ularning o`y-fikrlarini bilib, Iso ularga dedi: “O`z ichidan bo`linib ketgan har bir podshohlik xarob bo`ladi, o`z ichidan bo`linib ketgan har bir shahar yoki uy abgor bo`ladi. **26** Agar shayton shaytonni quvib chiqarsa, unda u o`z-o`zidan bo`lingan bo`ladi. Endi uning saltanati qanday tura oladi? **27** Agar Men jinlarni iblisning kuchi bilan quvib chiqarayotgan bo`lsam, u holda sizlarning o`g`illaringiz kimning kuchi bilan quvib chiqaradi? Shu bois, ularning o`zi sizlarni hukm qiladilar. **28** Magar Men Xudoning Ruhi bilan jinlarni quvib chiqarayotgan ekanman, u demak, Xudoning Shohligi sizlarga yetib kelgan. **29** Uyning egasi bo`lgan baquvvat kishini avval bog`lab qo`ymasdan turib, birov uning uyiga kirib, mol-mulkini o`g`irlab keta olarmidi? Faqat shunday qilibgina uyni talash mumkin. **30** Kim Men bilan birga bo`lmasa, Menga qarshidir. Kim Men bilan birga yig`masa, sochadi. **31** Shuning uchun sizlarga aytaman: insonlarning har qanday gunohi va kufrligi kechiriladi. Lekin Muqaddas Ruhni kufr qilganlar kechirilmaydi. **32** Kim Inson O`g`liga qarshi so`z aytsa, kechiriladi. Lekin kim Muqaddas Ruhga qarshi so`z aytsa, ikki dunyoda ham kechirilmaydi. **33** Yo daraxtni yaxshi der ekansiz, mevasini ham yaxshi deng. Yoki daraxtni yomon der ekansiz, mevasini ham yomon deng. Chunki har bir daraxt o`z mevasidan bilinur. **34** Voy ilonlar zoti-yey! Sizlar yovuz bo`la turib, qanday qilib yaxshi so`zlay olasiz? Axir, odamning dilida nima bo`lsa, tili o`shani gapiradi-ku! **35** Yaxshi odam yuragining yaxshilik xazinasidan yaxshilik chiqarur. Yomon odam yuragining yomonlik xazinasidan yomonlik chiqarur. **36** Men sizga deymanki: insonlar aytadigan har bir bekor so`zi uchun qiyomat kunida hisob beradilar. **37** Sen o`z so`zlaring asosida yo oqlanasan, yoki ayblanasan”.



## Isodan dalil so`rash

**38** Shunda ulamolar va farziylardan baʼzilari Isoga: “Ustoz, biz Sendan shularning biron bir dalilini koʻrmoqchimiz”, - dedilar. **39** Iso ularga javoban dedi: “Bu yovuz va subutsiz nasl dalil izlayapti, lekin Yunus paygʻambarning alomatidan boshqa unga dalil berilmaydi. **40** Yunus paygʻambar uch kunu uch tun kit qornida boʻlgani kabi, Inson Oʻgʻli ham xuddi shunday uch kunu uch tun yer bagʻrida boʻladi. **41** Nineviya odamlari qiyomat kunida bu nasl bilan birga tirilib, uni mahkum etadilar. Chunki ular Yunusning va ʼzi sababli tavba-tazarru qilganlar. Va mana, Yunusdan buyukrogʻi shu yerdadir. **42** Janub malikasi qiyomat kunida bu nasl bilan birga koʻtarilib, uni mahkum etadi. Chunki u Sulaymonning hikmatini tinglash uchun dunyoning olis burchidan kelgan edi. Va mana, Sulaymondan buyukrogʻi shu yerdadir. **43** Yovuz ruh insondan chiqib ketgandan soʻng, rohat izlab suvsiz yerlarni aylanadi va topolmagach: **44** “Men chiqqan uyimga qaytib boraman”, - deydi. U uyga kelgach uni kimsasiz, supurilgan va yigʻishtirilgan holda topadi. **45** Oʻshanda borib, oʻzidan yovuzroq yana yettita ruhni oʻziga ergashtiradi va uyga kirib yashaydilar. U odamning soʻnggi ahvoli esa avvalgidan battar boʻladi. Bu yomon nasl bilan ham shunday boʻladi”.

## Isoning onasi bilan ukalari

**46** Iso xalq ommasiga hali gapirib turgan vaqtda, Uning onasi bilan ukalari kelib qolishdi. Ular tashqarida kutib turib, U bilan gaplashmoqchi boʻlishdi. **47** Kimdir Isoga: - Mana, onang va ukalaring tashqarida Sen bilan gaplashmoqchi boʻlib turishibdi, - dedi. **48** Iso buni aytgan kishiga javob berib: - Mening onam kim? Ukalarim kim? - dedi. **49** Soʻng qoʻli bilan shogirdlarini koʻrsatib: - Mana, Mening onam va ukalarim! - dedi. **50** - Kimda-kim osmondagi Otamning irodasini bajo keltirsa, u Mening ukam, singlim va onam boʻladi.

## Xudo Shohligini tasvirlovchi yettita masal

**13:1** Oʻsha kuni Iso uydan chiqib, koʻl boʻyida oʻtirdi. **2** Uning oldida anchagina xaloyiq toʻplangach, U qayiqqa tushib oʻtirdi. Bor xaloyiq esa

qirg`oqda Unga ko`z tikdi. **3** Iso ularga masal yo`li bilan ko`p nasihatlar qildi: “Urug` sepuvchi urug` sepgani chiqibdi.

## Urug` sepuvchi

**4** Urug` sepayotganda ba`zi urug`lar yo`l yoqasiga tushibdi. Qushlar uchib kelib, ularni cho`qib ketibdi. **5** Boshqa ba`zi urug`lar esa tuprog`i kam toshloqqa tushibdi. Tuproq sayoz bo`lganidan, urug`lar tez ko`karib chiqibdi. **6** Biroq quyosh chiqqach, so`lib, ildizi bo`lmagani uchun qurib qolibdi. **7** Yana boshqa ba`zi urug`lar tikanlar orasiga tushibdi. Tikanlar o`sib, urug`larni bo`g`ib qo`yibdi. **8** Yana boshqa urug`lar esa yaxshi yerga tushib, ba`zisi yuz, ba`zisi oltmish, ba`zisi o`ttiz qat hosil beribdi. **9** Kimning eshitar qulog`i bo`lsa, eshitsin!”

## Masallarning maqsadi

**10** Shogirdlar yaqinroq kelib, Isodan: - Nega xalqqa masallar bilan gapiryapsan? - deb so`radilar. **11** U ularga javob berib dedi: - Chunki Osmon Shohligining sirlarini bilish qobiliyati sizlarga berilgan, ularga berilmagan. **12** Zero kimda bor bo`lsa, unga yana beriladi va u mo`lchilikda bo`ladi. Ammo kimda yo`q bo`lsa, bori ham undan tortib olinadi. **13** Xalqqa masal bilan gapirishimning sababi shundaki, ular qarab turib ko`rmaydilar, quloq solib turib eshitmaydilar va anglamaydilar. **14** Isha yo` payg`ambarning karomati ularga juda to`g`ri keladi, mana Xudo shunday degan: “Tinglab tursangiz-da, anglamaysizlar, Qarab tursangiz-da, ko`rolmaysizlar. **15** Bu xalqning dilini-chi yog` bosgan, Arang eshitar quloqlari ham, Ko`zlarini esa yumib olganlar. Ko`z ko`rsin deb, quloq eshitsin deb, Dil farosatli bo`lsin deb, Menga iltijo qilsalar edi, Men ularga shifo berar edim”. **16** Lekin ko`zlaringiz ko`rayotgan va quloqlaringiz eshitayotgan sizlar qanday baxtlisizlar! **17** Sizga chinini aytayin: ne-ne payg`ambaru solihlar siz ko`rayotganlarni ko`rishni orzu qilganlar-u ko`rolmaganlar, siz eshitayotganlarni eshitishni orzu qilganlar-u eshitolmaganlar.

## Urug` sepuvchi haqidagi masalning ma`nosi

**18** “Endi sizlar urug` sepuvchi haqidagi masalni yaxshi tinglanglar. **19** Xudoning Shohligi to`g`risidagi kalomni eshitib, uqib olmagan har bir kishiga yovuz shayton kelib, uning yuragiga ekilgan ezgulik urug`larini o`g`irlab ketadi. Yo`l yoqasiga tushgan urug`lar ana shularga ishoradir. **20** Toshloqqa sepilgan urug`lar esa shunday kishini bildiradi: u kalomni eshitar-eshitmas sevinch bilan qabul qilaveradi. **21** Lekin ildizi yo`q, beqaror kishi bo`lgani uchun, kalom tufayli qayg`u yoki quvg`inga duchor bo`lgan hamon vasvasaga tushib qoladi. **22** Tikanlar orasiga sepilgan urug`lar esa shunday odamni bildiradi: u kalomni eshita-da, bu dunyoning tashvishlari va boyluk rujui kalomni bo`g`ib tashlaydi va kalom samarasiz qoladi. **23** Yaxshi yerga sepilgan urug`lar esa, kalomni eshitib uni uqib oladigan odamni bildiradi. Bunday kishi, albatta, samarali bo`ladi; kimi yuz, kimi oltmish, kimi o`ttiz qat hosil beradi”.

## Begona o`t

**24** Iso ularga boshqa bir masalni keltirdi: “Osmon Shohligi o`z dalasiga yaxshi urug` sepgan bir odamga o`xshaydi. **25** Hamma uxlab yotganda, u odamning dushmani kelib bug`doy orasiga begona o`t urug`larini sepib ketibdi. **26** Ekin ko`karib boshoq chiqarganda, begona o`tlar ham paydo bo`libdi. **27** Yer egasining xizmatkorlari kelib: - Xo`jayin, siz dalangizga yaxshi urug` sepgan emasmidingiz? Endi bu begona o`tlar qayerdan paydo bo`ldi? - deb so`rashibdi. **28** - Bu dushmanning ishidir, - debdi yer egasi. - Istasangiz, biz borib ularni yulib tashlaymiz, - deyishibdi xizmatkorlar. **29** - Yo`q, - debdi u, - sizlar begona o`tlarni yulayotganda, ular bilan birga bug`doyni ham yulib olishingiz mumkin. **30** O`rim-yig`im vaqtigacha qo`yinglar, u ham, bu ham birga o`saversin. O`rim-yig`im bo`lgach, men o`roqchilarga: “Oldin begona o`tlarni o`rib olinglar va bog`-bog` qilib yoqishga tayyorlanglar. Bug`doyni esa mening omborimga to`plab qo`yinglar”, deb aytaman”.

## Xantal urug`i

**31** Iso ularga yana boshqa bir masalni aytib berdi: “Osmon Shohligi bir odam o`z dalasiga sepib qo`ygan xantal urug`iga o`xshaydi. **32** U barcha urug`lardan kichik bo`lsa-da, lekin yetilgach, hamma ko`katlardan baland bo`lib o`sadi. U shunday daraxt bo`ladiki, ko`k yuzidagi qushlar uchib kelib, uning shoxlarini o`zlariga uya qiladilar”.

## Xamirturush burdasi

**33** Iso ularga boshqa bir masalni ham aytib berdi: “Osmon Shohligi bir ayol butun xamirni oshirish uchun uch tog`ora unga qorishtirib solgan xamirturush burdasiga o`xshaydi”. **34** Iso bularning hammasini xalqqa masallar bilan tushuntirdi. Masalsiz ularga hech narsani tushuntirmas edi. **35** Shu bilan payg`ambarga vahiy bo`lgan shu so`z bajo keldi: “Og`zimni masallar aytmogga ochib, Azaliy sirlardan voqif etaman”.

## Begona o`tlar haqidagi masalning ma`nosi

**36** Shundan so`ng Iso xaloyiqqa javob berib, uyga kirdi. Shogirdlari Uning oldiga kelib: - Daladagi begona o`tlar haqidagi masalni bizlarga tushuntirib bergin, - dedilar. **37** Iso ularga javoban dedi: - Yaxshi urug`ni sepgan - Inson O`g`lidir, **38** dala esa - dunyo. Yaxshi urug`lar - Xudo hokimiyatidagi odamlar, begona o`tlar esa - yovuz shayton hokimiyatidagi odamlardir. **39** Begona o`tlarni sepgan dushman bo`lsa - iblisdir. O`rim-yig`im - dunyoning oxiri, o`roqchilar esa farishtalarga teng keladi. **40** Begona o`tlarni qanday terib o`tda yoqsalar, bu dunyoning oxirida ham shunday bo`ladi. **41** Inson O`g`li O`z farishtalarini yuboradi, ular esa gunohga sabab bo`lgan va yomonlik qilib yurgan barchani Uning Shohligidan yig`ib olib, **42** lovullab turgan o`choqqa tashlaydilar. U yerda yig`i-sig`i va ohu nola bo`ladi. **43** O`shanda solihlar o`z Otalarining Shohligida quyosh kabi porlaydilar. Kimning eshitar qulog`i bo`lsa, eshitsin!

## Yashirilgan xazina

**44** “Yana Osmon Shohligi dalada yashirilgan xazinaga o`xshar. Uni bir odam topib sir saqlabdi va juda sevinganidan borib, bor-yo`g`ini sotib, u dalani xarid qilibdi”.

## Qimmatbaho marvarid

**45** “Yana Osmon Shohligi nodir marvarid izlayotgan bir savdogarga o`xshar. **46** U qimmatbaho marvaridni topganda, borib bor-yo`g`ini sotib, marvaridni xarid qilibdi”.

## Dengizga tashlangan to`r

**47** “Yana Osmon Shohligi dengizga tashlangan va turli baliqlarni tutgan to`rga o`xshaydi. **48** To`r to`lgach, uni qirg`oqqa tortib chiqarishibdi va o`tirishib, yaxshi baliqlarni saralab idishlarga solishibdi, yomonlarini esa tashqariga tashlab yuborishibdi. **49** Dunyoning oxirida ham shunday bo`ladi: farishtalar kelib, fosiqlarni solihlar orasidan ajratib, **50** ularni lovullab turgan o`choqqa tashlaydilar. U yerda yig`i-sig`i va ohu nola bo`ladi”. **51** Iso shogirdlaridan so`radi: - Bularning hammasiga tushudingizlarmi? - Tushundik, - dedi ular. **52** Iso shogirdlariga: - Demak, Osmon Shohligi to`g`risida ta`lim-tarbiya olgan har bir ulamo o`z xazinasidan yangi va eski narsalar chiqaradigan uy egasiga o`xshaydi, - dedi.

## Isoning O`z yurtida rad qilinishi

**53** Iso bu masallarni aytib bo`lgach, u yerdan ketdi. **54** O`z vataniga kelib, yerli xalqning ibodatxonasida ta`lim bera boshladi. Ular esa hayratda qolib: - Shunday donolik va mo`jizakorlik qudrati Unga qayerdan nasib bo`ldi ekan? **55** Duradgorning o`g`li emasmi O`zi? Onasining ismi Maryam, ukalari esa Yoqub, Yusuf, Simun va Yahudolar emasmi? **56** Uning hamma singillari ham bizning oramizda-ku! Bularning barchasiga U qanday qilib erishdi ekan? - deyishdi. **57** Va g`ashlanib, Uni rad qilishdi. Iso esa ularga: - Payg`ambar o`z vatani va uyidan boshqa yerda

e fiborsiz bo`lmas, - dedi. **58** Ularning e fiqodsizligi sababli u yerda ko`p mo`jizalar ko`rsatmadi.

## Yahyo payg`ambarning boshini olish

**14:1** O`sha kezlarda viloyat hokimi Hirod Iso to`g`risidagi ovozalarni eshitib, **2** o`zining amaldorlariga: - Bu Yahyo payg`ambar-ku, u qaytadan tirilibdi! Shuning uchun U orqali ajoyibotlar sodir bo`lmoqda, - dedi. **3** Hirod o`z ukasi Filipning xotini Hirodiya tufayli Yahyoni tutib kishanlagan va zindonga tashlagan edi. **4** Chunki Yahyo unga: “Bu xotinni olish sen uchun ravo emas”, - deb aytib yurgan edi. **5** Hirod Yahyoni o`ldirmoqni istagan bo`lsa-da, xalqdan qo`rqardi. Chunki Yahyoni payg`ambar deb hisoblashardi. **6** Hirodning tug`ilgan kuni nishonlangan yig`inda Hirodiyaning qizi o`rtaga chiqib o`ynadi va Hirodning ko`nglini topdi. **7** Natijada Hirod u nimaiki so`rasa, topmoqqa qasam ichib, unga va`da berdi. **8** Qiz esa onasining tashviqiga ko`ra: - Menga hoziroq laganda Yahyo payg`ambarning boshini keltirib bering! - dedi. **9** Shoh xafa bo`ldi-yu, lekin o`zi bilan birga yeb-ichib o`tirganlarning ko`zi oldida qasam ichganligi uchun, bu iltimosning bajarilishini buyurdi. **10** Zindonga odam yuborib, Yahyoning boshini oldirdi. **11** Uning boshini laganda keltirib qizga berdilar, qiz esa onasiga olib borib berdi. **12** Yahyoning shogirdlari kelib, uning jasadini olib ko`mdilar. Keyin borib Isoga xabar berdilar.

## Isoning 5000 kishini to`ydirishi

**13** Iso buni bilib olgach, bir O`zi qayiqqa tushib, u yerdan xilvat joyga suzib ketdi. Xaloyiq buni eshitib, shaharlardan piyoda yo`lga tushib, Uning orqasidan ergashdi. **14** Iso qayiqdan chiqib, tumonat odamni ko`rdi. Ularga achindi va ularning xastalariga shifo berdi. **15** Oqshom tushgach, shogirdlari Uning yoniga kelib dedilar: - Bu yerlar yovon ekan, endi vaqt kech bo`lib qoldi. Xaloyiqqa ruxsat bergin, qishloqlarga borib o`zlariga ovqat sotib olsinlar. **16** Lekin Iso ularga: - Ular ketishlari kerak emas, sizlar ularga ovqat beringlar, - dedi. **17** - Bu yerda bizning beshta non va ikkita balig`imiz bor xolos, - deyishdi Unga. **18** - Ularni bu yerga, Menga

keltiringlar, - dedi Iso. **19** So`ng U xaloyiqqa o`t ustiga yonboshlashlarini buyurdi. Beshta non bilan ikkita baliqni olib, osmonga qarab duo qildi. Nonlarni sindirib shogirdlariga berdi, ular esa xaloyiqqa tarqatishdi. **20** Hammalarining qorni to`ydi. Ortib qolgan burda nonlarni terib olishganda, to`la o`n ikki savat chiqdi. **21** Yeganlar esa xotinlar va bolalardan tashqari besh mingga yaqin kishi edi.

### Isoning suv ustida yurishi

**22** Iso shogirdlarini o`sha zahoti qayiqqa tushirib, narigi tomonga suzib o`tishga majbur qildi. Ungacha O`zi odamlarga ruxsat beradigan bo`ldi. **23** U xaloyiqni jo`natib bo`lgandan keyin, tanho O`zi ibodat qilish uchun toqqa chiqdi. Kech kirganda, u yerda yolg`iz O`zi qoldi. **24** Qayiq esa ko`lning o`rtasida bo`lib to`lqinlarda chayqalar, yoqimsiz shamol esmoqda edi. **25** Subhidamda Iso ko`l tomondan shogirdlari yoniga keldi. **26** Ular esa Uning ko`l ustida yurib kelayotganini ko`rib, dahshatga tushdilar. - Bu bir sharpa! - deb qo`rquvdan qichqirib yubordilar. **27** Lekin Iso shu zahot ular bilan muloqotga kirib: - Dadil bo`linglar, bu Men, qo`rqmanglar! - dedi. **28** Butrus gapga kirib: - Yo Rabbim, agar bu Sen bo`lsang, menga buyruq ber, men suv ustida yurib Sening yoningga boray! - dedi. **29** Iso: - Kel! - dedi. Butrus esa qayiqdan chiqib, suv ustidan yurganicha Isoning yoniga yo`l oldi. **30** Lekin kuchli shamolni ko`rib, o`takasi yorildi. U cho`ka boshlagach: - Yo Rabbim, meni qutqar! - deb baqirdi. **31** Iso o`sha zahoti qo`lini uzatib, uni ushlab qoldi-da: - Ha, imoni sust, nega sen ikkilanding? - dedi. **32** Ular qayiqqa o`tishlari bilanoq shamol tindi. **33** Qayiqdagilar esa Isoga sajda qilib: - Haqiqatan ham Sen Xudoning O`g`lisan! - deyishdi. **34** Ko`ldan suzib o`tib, Genisaret qirg`og`iga kelib to`xtashdi. **35** U yerning odamlari Isoni tanib qolishdi. Butun tevarakatroflarga odam yuborib, biron dardga chalinganlarning hammasini Uning oldiga yig`ishdi. **36** Aqalli kiyimining etagiga tegish uchun Undan iltimos qilishdi, tekkanlar esa dardlaridan xalos bo`ldi.

## Diniy urf-odatlar va Xudoning amri

**15:1** O`shanda Quddusdan ba`zi ulamolar va farziylar Isoning oldiga kelib, savol berdilar: **2** - Sening shogirdlaring nega ota-bobolar urf-odatini buzib yuribdi? Hatto ovqatlanayotganda ham ular qo`llarini yuvishmaydi! **3** Iso ularga javob berib dedi: - Nega sizlar ham o`z urf-odatingizni deb Xudoning amrini buzib yuribsizlar? **4** Xudo Tavrotda shunday amr bergan: “Ota-onangni hurmat qil”, va “Ota-onasini haqorat qilgan albatta o`ldirilsin”. **5** Ammo sizlar: “Agar kim ota yoki onasiga: “Mening senga yordamim Xudoga bag`ishlangan”, - desa, **6** “u ota yoki onasini hurmat qilmasa ham bo`ladi”, - deysizlar”. Shunday qilib, siz o`zingizning urf-odatingizni deb Xudoning amrini bekor qildingizlar. **7** Ey munofiqlar! Siz haqda karomat qilib aytgan Isha`yo payg`ambarning ushbu so`zlari to`g`ri chiqdi: **8** “Bu xalq Menga yaqinlashar faqat og`izda, Va Meni hurmatlar faqat tilida. Lekin dili esa Mendan uzoqdur. **9** Ular Meni behuda sano etur, Insonlar amru ta`limin o`rgatib”.

### Insonni nima harom qiladi?

**10** Keyin Iso xalqni yoniga chaqirib, ularga dedi: - Menga quloq solib, miyaga joylang! **11** Og`izga kiradigan narsa emas, balki og`izdan chiqadigan narsa insonni harom qiladi. **12** Shunda shogirdlari kelib Isoga: - Bilyapsanmi, farziylar bu so`zni eshitgach vasvasaga tushdilar, - deyishdi. **13** Iso javob berib dedi: - Samoviy Otam o`tqazmagan har bir o`simlik tag-tomiri bilan sug`urib tashlanadi. **14** Ularni qo`yinglar, ular ko`rlarning ko`r yo`lboshchilaridir. Agar ko`r ko`rni yetaklab yursa, unda ikkovi ham chohga tushib ketar. **15** Bunga javoban Butrus: - Bizga boyagi masalni tushuntirib ber! - dedi. **16** Iso dedi: - Sizlar ham hanuzgacha anglamadingizmi? **17** Og`izga kiradigan har bir narsa qoringa o`tib, kerak joydan chiqib ketishini hali ham tushunmadingizmi? **18** Biroq og`izdan chiqadigan narsalar esa yurakdan chiqadi. Ana shular insonni harom qiladi. **19** Yomon fikrlar, qotillik, fahshu zino ishlari, o`g`rilik, soxta guvohlik va haqoratlar bari yurakdan chiqadi. **20** Yuvilmagan qo`llar bilan ovqat yeyish insonni harom qilmaydi, ana shular insonni harom qiladi.



## G`ayriyahudiy ayolning ishonchi

**21** Iso u yerdan chiqib, Tir va Sido`n yurtiga ketdi. **22** O`sha tevarakdan kan ónlik bir ayol Isoni qarshilab: - Ey Hazrat, Dovudning O`g`li, menga rahm qil! Qizimni jin juda qattiq qiynayapti, - deb faryod chekdi. **23** Lekin Iso unga bir og`iz so`z ham javob bermadi. Shogirdlari kelib: - Uni qo`yib yubor, u orqamizdan dodlab yuribdi, - deb Isodan iltijo qildilar. **24** Iso esa javob berib: - Men faqat Isroil xalqining adashgan qo`ylari huzurigagina yuborilganman, - dedi. **25** Shunda ayol yaqinroq kelib: - Ey Hazrat, menga yordam ber! - deb Isoga sajda qildi. **26** Iso: - Bolalardan nonni olib itlarga tashlash yaxshi emas, - degan javobni qaytardi. **27** Ayol: - Xuddi shunday, Hazrat, lekin itlar ham xo`jayinlarining dasturxonidan tushgan ushoqlarni yeydilar-ku! - dedi. **28** Iso buni eshitib, ayolga: - Ey ayol, sening ishonching buyuk, sen tilagandek bo`lsin, - dedi. Ayolning qizi esa o`sha zahoti sog`ayib ketdi. **29** Iso u yerdan o`tib, Jalila ko`li atroflariga keldi. Toqqa chiqib, bir oz o`tirdi. **30** Huzuriga tumonat odam yig`ildi. Ular o`zlari bilan birga cho`loq, ko`r, soqov va boshqa ko`pgina mayib-majruhlarni olib kelib, Isoning oyoqlari oldiga qo`ydilar. Iso esa ularni sog`aytirdi. **31** Soqovlarning gapirayotganini, mayiblarning sog`lom bo`lib ketayotganini, cho`loqlarning yurib, ko`rlarning ko`zlari ochilayotganini xalq ko`rib, hayron bo`ldi va Isroilning Xudosiga hamd-sano aytdi.

## Isoning 4000 kishini to`ydirishi

**32** Iso shogirdlarini yoniga chaqirib ularga: - Xaloyiqqa achinaman, chunki uch kundir Mening oldimda turibdi va yeydigan hech narsasi yo`q. Men ularga ovqat bermay jo`natib yuborishni istamayman, chunki yo`lda darmonsizlanib qoladilar, - dedi. **33** Shogirdlari Unga: - Bu yovonda shuncha kishini to`ydiradigan yemakni qayerdan topamiz? - deyishdi. **34** - Qancha nonlaringiz bor? - so`radi Iso. - Yettita non va ozgina balig`imiz bor, - dedilar. **35** Shundan keyin Iso xaloyiqqa yerga o`tirishni buyurdi. **36** Yettita non va baliqlarni olib, shukrona duosini aytib sindirdi va shogirdlariga berdi, shogirdlari esa butun xaloyiqqa tarqatdi. **37** Hammalarining qorni to`ydi. Ortib qolgan non burdalari naq yetti savat bo`ldi. **38** Xo`randalar esa xotinlar va bolalardan tashqari to`rt ming kishi

edi. **39** Iso xaloyiqqa ruxsat berdi va qayiqqa tushib, Magdala atroflariga keldi.

## Zamonning alomatlarini bilish haqida

**16:1** Farziy va sadduqiy mazhabidagilar Isoni sinash maqsadda Uning oldiga kelib, osmondan alomat ko`rsatishini so`radilar. **2** Iso esa ularga javoban dedi: “Oqshom tushgach, siz: “Osmon qizil ekan, havo ochiq bo`ladi”, - deysizlar. **3** Ertalab esa: “Osmon qizil-qoramtir ekan, bugun havo buzuq bo`ladi”, - deysizlar. Voy munofiqlar-ey! Ko`k yuzini aniqlay olasiz-u, nega zamonning alomatlarini aniqlay olmaysizlar? **4** Bu buzuq va besubut avlod dalolatni-ku izlaydi, ammo Yunus payg`ambarning alomatidan boshqa unga biror bir dalolat bo`lmaydi”. Shunday deb, Iso ularni qoldirib ketdi.

## Idroksiz shogirdlarni koyish

**5** Narigi qirg`oqqa yetib kelgan shogirdlar o`zlari bilan non olishni unutibdilar. **6** Iso ularga: - Qaranglar, farziylar bilan sadduqiylarning xamirturushidan ehtiyot bo`linglar! - dedi. **7** Ular esa: “Buni non olmaganimiz uchun aytdi, chog`i”, deb ko`ngillaridan o`tkazdilar. **8** Iso buni bilib, ularga dedi: - Ey imoni sustlar! O`zingizcha nega: o`zimiz bilan non olmadik, deb andisha qilyapsizlar? **9** Hali ham anglamadinglarmi? Beshta nonni besh ming kishi yeb, necha savat non burdalarini yig`ishtirib olganingizni eslamayapsizlarmi? **10** Yoki yettita nonni to`rt ming kishi yeb, necha savat yig`ishtirib olganingizni-chi? **11** Men sizlarga: “Farziylar bilan sadduqiylarning xamirturushidan ehtiyot bo`linglar”, - deb aytganim bu non haqida emasligini qanday qilib tushunmadinglar? **12** Shundan keyin shogirdlar, Iso ularga nonning xamirturushidan emas, balki farziylar bilan sadduqiylarning ta`limotidan ehtiyot bo`lish kerakligini aytganini tushundilar.

## Butrusning Masihni tan olishi

**13** Filip Kesariyasi atroflariga kelgan Iso O`z shogirdlaridan so`radi: - Odamlar Meni, Inson O`g`lini, kim deb hisoblaydilar? **14** - Ba`zilari

Yahyo payg`ambar deb, boshqalari Ilyos payg`ambar deb, yana birlari esa Yeremiya yoki bo`lak payg`ambarlardan biri deb hisoblaydilar, - dedi shogirdlar. **15** Iso ulardan: - Sizlar-chi, Meni kim deb hisoblaysizlar? - deb so`ragach, **16** Simun Butrus javob berib dedi: - Sen barhayot Xudoning O`g`li - Masihsan! **17** Iso Butrusga javoban dedi: - Sen baxtiyorsan, ey Yunus o`g`li Simun! Bu sirni sen o`z uquv-idroking bilan uqqaning yo`q, balki osmondagi Otam senga ochib bergan. **18** Men ham senga shuni aytib qo`yay: sening tosh degan isming bor va Men O`z ummatimni bu tosh ustida bunyod etaman, jahannam kuchlari esa undan ustun chiqmas. **19** Osmon Shohligining ochqichlarini senga beraman. Yer yuzida sen nimani bog`lasang, osmonda ham bog`langan bo`ladi. Yer yuzida sen nimani yechsang, osmonda ham yechilgan bo`ladi. **20** Shundan so`ng Iso O`zining Masih ekanini biror kimsaga aytmoqni shogirdlariga qat íy man etdi.

### Iso O`z o`limi haqida

**21** Shu vaqtdan boshlab, Iso shogirdlariga O`zining Quddusga borishi, oqsoqollar, oliy ruhoniylar va ulamolar qo`lida ko`p azob chekib, o`ldirilishi, uchinchi kuni esa tirilishi kerakligini oshkor etadigan bo`ldi. **22** Butrus Uni chetga olib ta`na qila boshladi: - Xudo xayringni bersin, Rabbim! Bu narsalar Sening boshingga tushmas, - dedi. **23** Iso esa Butrusga qarab: - Yo`qol ko`zimdan, shayton! - dedi. - Sen Meni yo`ldan uryapsan, chunki sen Xudoning ishlarini emas, balki inson ishlarini o`ylayapsan. **24** Keyin Iso O`z shogirdlariga dedi: - Agar kim Menga ergashishni istasa, o`zidan kechsin va o`z xochini ko`tarib, orqamdan yursin. **25** Kim o`z jonini ayamoqchi bo`lsa, uni yo`qotadi. Lekin kim Men uchun jonini yo`qotsa, jon topadi. **26** Agar inson butun dunyoni egallasa-yu, o`z joniga zarar yetkazsa, bundan qanday naf ko`radi? Yoki inson o`z joni evaziga qanday to`lov toparkan? **27** Inson O`g`li O`z Otasining ulug`vorligida, farishtalari bilan kelishida, har kimni o`z qilmishiga yarasha taqdirlaydi. **28** Sizlarga chinini aytayin: bu yerda turganlardan ba`zilari borki, ular Inson O`g`lining saltanatli Shoh bo`lib kelayotganini ko`rmaguncha, o`lim ko`rmaydilar.

## Iso qiyofasining o`zgarishi

**17:1** Oradan olti kun o'tgandan keyin Iso tanho Butrus, Yoqub va uning ukasi Yuhannoni yoniga olib, baland bir toqqa olib chiqdi. **2** U yerda, ularning ko'z o'ngida Isoning qiyofasi o'zgarib ketdi. Uning yuzi quyoshday porlab, kiyimlari esa nurday oppoq tus oldi. **3** Birdaniga ularga Muso bilan Ilyos payg'ambarlar ko'rinib, Iso bilan suhbatlashayotganday tuyuldi. **4** Buni Butrus ko'rib, Isoga: - Rabbim! Bizlar uchun bu joy juda yoqyapti. Agar istasang, shu yerda uchta chayla quraylik: birisi Senga, birisi Musoga, birisi Ilyosga... **5** U gapini tugatmasdan, nur yog'ilib turgan bir bulut ularni qoplab oldi. Bulut ichidan esa bir ovoz keldi: - Bu Mening sevikli O'g'limdir, Undan mamnunman. Unga quloq solinglar! **6** Shogirdlar buni eshitgach, vahimaga tushib, yerga yuz tuban yiqildilar. **7** Iso esa kelib ularga qo'l tegizdi-da: - Turinglar, qo'rqmanglar! - dedi. **8** Ular boshlarini ko'tarib, yolg'iz Isodan boshqa hech kimni ko'rmadilar. **9** Tog'dan tushayotganlarida, Iso shogirdlariga: - Inson O'g'li qaytadan tirilib kelmaguncha, ko'rganlaringizni hech kimga aytmanglar, - deb tayinladi. **10** Shogirdlari Undan so'radilar: - Nega ulamolar, oldin Ilyos payg'ambar kelishi kerak, deb aytadilar? **11** Iso javob berib ularga dedi: - Bu to'g'ri, oldin Ilyos payg'ambar kelib, hamma narsani yo'lga qo'yadi. **12** Lekin Men sizlarga shuni aytaman: Ilyos allaqachon kelgan. Ammo odamlar uni tanimay, u bilan istaganlarini qilishdi. Xuddi shunga o'xshab, Inson O'g'li ham odamlar qo'lida azob chekishi muqarrardir. **13** Shunda shogirdlar Iso ularga Yahyo payg'ambar haqida gapirganligini angladilar.

## Iso tutqanoqli bolani sog'aytirishi

**14** Ular xaloyiq yoniga kelganlarida, bir odam Isoning oldiga kelib tiz cho'kdi-da: **15** - Hazrat, - dedi, - o'g'limga rahming kelsin! Uning tutqano'g'i bor, u juda azobda qoldi. Dam olovga, dam suvga tashlanadi. **16** Bolamni Sening shogirdlaringga ko'rsatdim, ammo ular uni tuzatisholmadi. **17** Iso javob berib: - Ey imonsiz, buzuq nasl-ey! Qachongacha sizni yoqlayveraman? Qachongacha sizga chidayin? Bolani bu yerga, Mening oldimga keltiringlar! - dedi. **18** Iso jinga do'q urgach, u boladan chiqib ketdi. Bola o'sha zahoti tuzaldi. **19** So'ngra shogirdlari

Isoning yakka qolganda oldiga kelib: - Nega biz jinni quvib chiqarolmadik? - deb so`rashdi. **20** Iso ularga: - E fiqodsizligingiz uchun! - dedi. - Chindan, sizlarga aytamanki: agar bir xantal doniday ishonchingiz bo`lsa-yu, bu toqqa: "Bu yerdan u yerga ko`ch", - deb aytsangizlar, u ko`chadi. Sizga hech bir narsa imkonsiz bo`lmaydi. **21** Biroq bu toifa jinlar ibodat va ro`zadan boshqa narsa bilan chiqmas. **22** Ular Jalilaga qaytib kelgandan so`ng, Iso shogirdlariga dedi: - Inson O`g`li odamlar qo`liga tutib berilishi muqarrardir. **23** Uni o`ldiradilar va U uchinchi kuni qaytadan tiriladi. Shogirdlar juda xafa bo`ldilar.

### Ma bad solig`i

**24** Ular Kafarnahunga kelganlarida, ikki diramlik ma bad solig`ini yig`uvchilar Butrusning oldiga kelib: - Sizlarning Ustozingiz ma bad solig`ini to`lamaydimi? - deb so`radilar. **25** Butrus: - To`laydi! - dedi. U uyga kelgach, Iso oldinroq gap ochib dedi: - Simun, sening fikring qanday? Bu dunyo podshohlari soliq yoki bojni kimdan oladilar? Vatan o`g`illaridanmi yoki begonalardanmi? **26** - Begonalardan-da, - dedi Unga Butrus. Iso javob berdi: - Unday bo`lsa, vatan o`g`illari soliqdan ozod ekan-da. **27** Shunga qaramay, biz ularni vasvasaga solmaylik. Sen ko`lga borib qarmoq tashla. Birinchi ilingan baliqni olib og`zini ochsang, to`rt diramlik tangaga ko`zing tushadi. Tangani olib, Men va o`zing uchun soliq to`lovi sifatida ularga ber.

### Xudo oldida kim buyuk?

**18:1** Shu kez shogirdlar Isoning oldiga kelib: - Osmon Shohligida kim buyuk? - degan savolni berdilar. **2** Iso yoniga bir bolani chaqirib, uni o`rtalarida turg`izib: **3** - Sizlarga chinini aytayin, - dedi. - Agar siz yo`lingizdan qaytib, bolalarday bo`lmasangiz, Osmon Shohligiga sira kirolmaysizlar. **4** Shunday qilib, kim bu bola kabi o`zini past olib yursa, Osmon Shohligida eng buyuk bo`ladi. **5** Kim shunday bir bolani Mening nomimdan qabul qilsa, Meni qabul qilgan bo`ladi.

## Vasvasa va gunoh haqida

**6** “Kimki Menga ishongan bu kichiklardan birontasini yoʻldan ozdirsa, uning boʻyniga ulkan tegirmon toshini osib dengiz chuqurligiga choʻktirilishi u uchun yaxshiroq boʻlar edi. **7** Vasvasalar dastidan bu dunyoning holiga voy! Vasvasalar kelishi shaksizdir, lekin kim orqali kelsa, oʻsha odamning holiga voy! **8** Agar qoʻling yoki oyogʻing seni yoʻldan ozdirsa, uni kesib tashla. Senga ikki qoʻlu ikki oyogʻing bilan abadiy oʻtga tashlanishdan koʻra, mayib yoki choʻloq boʻlib abadiy hayotga erishganing yaxshiroqdir. **9** Agar koʻzing seni yoʻldan ozdirsa, uni oʻyib tashla. Senga ikki koʻzing bilan oʻtli jahannamga tashlanishdan koʻra, bir koʻz bilan abadiy hayotga erishganing yaxshiroqdir”.

## Adashgan qoʻy haqida masal

**10** “Ehtiyot boʻlinglar, bu kichiklardan birontasini ham xor qilmanglar. Men sizga shuni aytaman: osmonda ularning farishtalari doimo samoviy Otamning jamolini koʻrib turadilar. **11** Inson Oʻgʻli esa adashib gumroh boʻlganlarni qutqarish uchun kelgan. **12** Sizlarning fikringiz qanday? Agar bir odamning yuzta qoʻyi boʻlib, ulardan biri adashib qolsa, toʻqson toʻqqizini togʻlarda qoldirib, adashib qolganni izlab ketmaydimi? **13** Agarda uni topib olsa bormi, sizga rostini aytsam, adashmagan toʻqson toʻqqiztasidan koʻra, shu bir qoʻy uchun u koʻproq sevinadi. **14** Shunga oʻxshab, osmondagi Otangiz bu kichiklardan birining ham halok boʻlishini istamaydi”.

## Birodaring gunoh qilsa...

**15** “Agar birodaring senga qarshi gunoh qilsa, uning oldiga borib, faqat yuzma-yuz gapirib, aybini unga koʻrsat. Agar senga quloq solsa, sen birodaringni qaytarib olgan boʻlasan. **16** Agar senga quloq solmasa, oʻzing bilan yana bir yoki ikki kishini olib bor, toki Tavrotda yozilganidek “aytiluvchi har bir soʻz ikki yoki uch shohidning guvohligi bilan tasdiqlansin”. **17** Agar ularga ham quloq solmasa, imonlilar jamoatiga ayt. Agar imonlilar jamoatiga ham quloq solmasa, uni kofir yoki tamagir qatorida sana. **18** Sizlarga chinini ayting: yer yuzida sizlar nimaiki

bog`lasangizlar, osmonda ham bog`langan bo`ladi. Yer yuzida nimaiki yechsangizlar, osmonda ham yechilgan bo`ladi. **19** Sizlarga yana shuni ham aytay: agar yer yuzida sizdan ikki kishi yakdil bo`lib, qandaydir bir narsani so`rashsa, Mening osmondagi Otam ularning tilagini bajaradi. **20** Qayerda ikki yoki uch kishi Mening nomim uchun yig`ilsa, Men shu yerda ularning o`rtasida bo`laman”.

### Rahmsiz banda haqida masal

**21** Shu vaqtda Butrus kelib Isoga: “Rabbim, - dedi, - agar birodarim menga qarshi gunoh qilsa, men necha marta uni kechirayin? Yetti marta kechsam yetarmi?” **22** Iso unga dedi: “Senga yetti marta emas, balki yetmish karra yetti marta, deyapman. **23** Binobarin, Osmon Shohligi bandalari bilan hisob-kitob qilishni istagan bir podshohga o`xshaydi. **24** Hisoblashishni boshlaganda, undan o`n ming oltin yombi qarzdor bo`lgan bir bandani uning qoshiga keltiribdilar. **25** Lekin qarz to`lashga hech narsasi bo`lmagani uchun, podshoh unga o`zini, xotinini, bolalarini va butun mol-mulkini sotib, qarzini to`lashni buyuribdi. **26** Banda esa yerga yiqilib, podshohiga ta`zim qilib: - Podshohim, sabr qiling, men sizga hammasini to`layman, - debdi. **27** Bu bandasiga rahmi kelib, podshoh uni qo`yib yuboribdi va qarzini kechirib yuboribdi. **28** U banda esa tashqariga chiqib, o`zidan yuz kumush tanga qarzdor bo`lgan bir sherigini uchratib, uni ushlab olibdi-da: - Mendan olgan qarzingni qaytar! - deb bo`g`a boshlabdi. **29** Sherigi esa uning oyoqlariga yiqilib: - Sabr qil, men senga hammasini to`layman, - deb yolvoribdi. **30** Biroq u bunga ko`nmabdi, borib, qarzini to`lamagunicha sherigini zindonga qamatib qo`yibdi. **31** Uning sheriklari bu voqeani ko`rib, juda xafa bo`lishibdi va borib, podshohga hamma bo`lib-o`tganni xabar qilishibdi. **32** Shunda podshoh bandasini oldiga chaqirib: - Ey yovuz banda! - debdi. - Menga yolvorganing uchun, men sening barcha qarzingdan kechdim. **33** Men senga rahm qilganimday, sen ham sherigingga rahm qilsang bo`lmasmidi? **34** G`azablangan podshoh hamma qarzini to`lamagunicha bandasini azob beruvchilarning qo`liga topshiribdi. **35** Shuningdek, agar sizlarning har biringiz o`z birodaringizning gunohini chin ko`ngildan kechirmasangiz, Mening samoviy Otam ham sizlarga xuddi shu yo`lni tutadi”.

## Nikoh va ajralish haqida

**19:1** Iso bu soʻzlarni aytib boʻlgach, Jalilani tark etib, Yahudiya hududiga, Oʻrdun daryosining narigi tomoniga keldi. **2** Tumonat xaloyiq Uning ketidan ergashib yurdi. Iso u yerda xastalarga shifo berdi. **3** Isoni sinash niyatidagi baʼzi farziylar Uning oldiga kelib: - Erkak har qanday sababga koʻra oʻz xotinidan ajralishi mumkinmi? - degan savolni berdilar. **4** Iso ularga javoban: - Tavrotda oʻqimagansizlarmi? - dedi. - Parvardigor boshdanoq odamlarni erkak va ayol qilib yaratdi **5** va dedi: “Er kishi otanasini qoldirib, oʻz xotiniga yopishib qoladi va ikkovi bir tan boʻladi”. **6** Shunga koʻra ular endi ikki emas, balki bir tan hisoblanadilar. Xudo birga qoʻshganini bandasi ajratmasin. **7** Ular Isoga: - Unday boʻlsa, Muso nima uchun: “Erkak xotini bilan ajralsa, taloq xatini yozib bersin”, deb amr etganlar? - deyishdi. **8** U ularga dedi: - Bagʻri tosh odamlar boʻlganingiz uchun Muso sizlarga xotinlaringiz bilan ajralishga ijozat bergan. Lekin boshdan bunday emas edi. **9** Men sizlarga shuni aytayin: kim bevafoqlikdan boshqa sabab tufayli xotinidan ajralib, oʻzgaga uylansa, zino qilgan boʻladi. Shuningdek, eridan ajralgan xotininga uylangan ham zino qilgan boʻladi. **10** Shogirdlar Isoga: - Agar erkakning xotiniga nisbatan shunday majburiyati boʻlsa, uylanmagan yaxshiroq ekan-da! - deyishdi. **11** Iso ularga: - Bu soʻzni hamma ham hazm etolmaydi, - dedi. - Kingaki nasib boʻlsa, u hazm eta oladi. **12** Baʼzi kishilarning onadan tugʻma erkakligi zaifdir. Boshqalar esa odamlar tomonidan axta qilinadilar. Yana boshqalar Osmon Shohligi yoʻlida uylanishdan voz kechadilar. Uddalagan bu gaplarning magʻzini chaqsin.

## Isoning bolalarni duo qilishi

**13** Shunda Iso ularning peshanalariga qoʻllarini qoʻyib duo qilishi uchun, Uning oldiga bolalarni keltirishdi. Shogirdlari yetaklab keluvchilarni koyiy boshlagach, **14** Iso dedi: - Bolalarni qoʻyinglar, Mening oldimga kelishlariga toʻsqinlik qilmanglar. Zero Osmon Shohligi shundaylarnikidir. **15** Ularning peshanalarini silab, u yerdan joʻnab ketdi.



## Boyluk va abadiy hayot

**16** Shu mahal bir kishi Isoning yoniga kelib: - Valine ímat Ustozim! Abadiy hayot nasib bo`lishi uchun qanday savobli ish qilmog`im lozim? - deb so`radi. **17** Iso unga dedi: - Nega sen Mendan savobli ish haqida so`rayapsan? Birgina Xudodan boshqa hech kim savob egasi emas. Agar boqiy hayotga erishmoq istasang, ilohiy amrlarga rioya qil. **18** - Qaysilariga? - deb so`radi u. Iso dedi: - “Odam o`ldirma. Zino qilma. O`g`rilik qilma. Soxta guvohlik berma. **19** Ota-onangni hurmat qil. O`zgani o`zing kabi sev”, degan amrlarni-da. **20** Yigit Unga dedi: - Men bularning hammasini yoshligimdan saqlab kelaman. Menga yana nima yetishmaydi? **21** Iso unga: - Agar komil bo`lishni istasang, bor, hamma mol-mulkingni sotib, pulini kambag`allarga tarqat. Shundagina ko`kda xazinang bo`lur. Va kel, Mening ortimdan ergash, - dedi. **22** Yigit bu so`zlarni eshitib, qayg`u ichida u yerdan chiqib ketdi. Chunki uning pul-dunyosi ko`p edi. **23** Iso shogirdlariga: - Sizga chinini aytayin: boy odamning Osmon Shohligiga kirishi qiyin bo`ladi. **24** Yana sizga aytaman: boy odamning Xudo Shohligiga kirishidan ko`ra, tuyaning igna teshigidan o`tishi osondir, - dedi. **25** Shogirdlari buni eshitib, chandon taajjublandilar va: - Unday bo`lsa, kim najot topa olarkan? - deb so`radilar. **26** Iso ularga ko`zlarini tikib: - Odamlarga bu imkonsiz, lekin Xudoga hamma narsa mumkindir, - dedi. **27** Bu so`zga javoban, Butrus Isoga dedi: - Mana, biz hamma narsani qoldirib, Sening orqangdan ergashib keldik. Buning evaziga biz nima toparmiz? **28** Iso ularga dedi: - Sizga chinini aytayin: yangi dunyoda Inson O`g`li O`zining ulug`vor taxtida o`tirganida, Mening orqamdan ergashib kelgan sizlar ham o`n ikkita taxtga o`tirib, Isroilning o`n ikki qabilasini hukm qilasizlar. **29** Men uchun uy-joy, aka-uka, opa-singil, ota-ona, xotin-bola yoki yer-mulkini tashlab ketgan har bir kishi bulardan yuz hissa ortiqrog`ini topib, abadiy hayotga noil bo`lajak. **30** Lekin ko`p birinchi bo`lganlar oxirgi, oxirgilar esa birinchi bo`ladilar.

## Uzumzorda ishlovchilar haqida masal

**20:1** “Shunday qilib, Osmon Shohligi uzumzoriga erta saharda mardikorlar yollagani chiqqan bog` egasiga o`xshaydi. **2** U mardikorlar

bilan kuniga bir kumush tanga berishga kelishib, ularni o`zining uzumzoriga yuboribdi. **3** Soat to`qqizlarda u yana chiqib, bozor maydonida bekor turgan boshqa odamlarni ko`rib, **4** ularga: - Sizlar ham mening uzumzoriga boringlar, men sizlarga tegishli haqingizni beraman, - debdi. Ular esa boribdilar. **5** Tush chog`i va soat uchga yaqin u tag`in chiqib, yana shunday qilibdi. **6** Soat beshlarda chiqib, bekor turgan yana boshqalarni ko`ribdi-da: - Nega sizlar bu yerda kun bo`yi bekor turibsizlar? - deb so`rabdi. **7** Ular esa: - Hech kim bizlarni ishga yollamadi-da, - debdilar. Shunda bog` egasi: - Sizlar ham mening uzumzoriga boringlar, tegishli haqingizni olasizlar, - debdi. **8** Kech bo`lgach, uzumzor egasi o`zining hosilotiga: - Mardikorlarni chaqirib, ularga oxirgisidan boshlab birinchisigacha xizmat haqlarini bergin, - deb buyuribdi. **9** Shunday qilib, soat beshlarda ish boshlaganlar bir kumush tangadan olishibdi. **10** Birinchi kelganlar esa ko`proq olamiz, deb o`ylashibdi. Ammo ular ham bir kumush tangadan olishibdi. **11** Ular xizmat haqini olgach, bog` egasiga norozilik bildira boshlashibdi: **12** - Bu oxirgi kelganlar bir soatgina ishladi, siz esa ularni kunning issig`iyu mashaqqatini tortgan bizlar bilan teng ko`rdingiz. **13** Bunga javoban bog` egasi ulardan biriga: - Do`stim, men senga nohaqlik qilganim yo`q. Sen men bilan bir kumush tangaga kelishgan edingmi? **14** Endi haqingni olib, boraver. Men senga berganacha aqchani bu oxirgi kelganga ham bersam, nima bo`pti? **15** O`z pulimni xohlaganacha istifoda qilish o`z ixtiyorimda emasmi? Yoki mening saxiyligimni ko`rolmayapsanmi? - debdi. **16** Shunga o`xshab, oxiratda ham oxirgilar birinchi va birinchilar esa oxirgi bo`ladilar. Chunki da`vat etilganlar ko`p, ammo tanlanganlar ozdir. ”

### Iso O`z o`limini uchinchi bor aytishi

**17** Iso Quddusga qarab yo`l olar ekan, o`n ikki shogirdini alohida chaqirib, ularga dedi: **18** “Hozir Quddusga boryapmiz va Inson O`g`li oliy ruhoniylar bilan ulamolarga tutib beriladi. Ular esa Uni o`limga mahkum etadilar. **19** Haqoratlash, qamchilash va xochga mixlash uchun Uni majusiylarga topshiradilar. Uchinchi kuni esa U qaytadan tirilajak”.

## Bir onaning tilagi

**20** Shunda Zabadiylar oilasining onasi o`g`illari bilan birga Isoning huzuriga keldi. Nimadir so`ramoqchi bo`lib, Unga ta`zim qildi. **21** Iso ayoldan so`radi: - Sen nima istaysan? - Sening Shohligingda bu mening ikki o`g`limning biri o`ng tomoningda va biri chap tomoningda o`tirishlarini buyurgin! - dedi Unga ayol. **22** Iso javob berib dedi: - Sizlar nima so`rayotganingizni bilmaysizlar. Men ichajak hasratli taqdir sharobini icha olasizlarmi? - Ichamiz! - dedi ular. **23** Iso ularga: - Sizlar-ku Mening kosamdan ichib, hasratlarimni chekasizlar, ammo Mening o`ng va chap tomonimda o`tirishga ruxsat berish Mening ixtiyorimda emas. Otam bu o`rinni kimlarga tayyorlagan bo`lsa, ularga buyuradi, - dedi. **24** Boshqa o`n shogird buni eshitgach, ikki aka-ukaga achchiqlana ketishdi. **25** Iso esa ularni yoniga chaqirib, dedi: - Bilasizlarki, dunyo xalqlari ustidan saltanatli podshohlar bor, el ustidan otabeklar hokimlik qiladi. **26** Ammo sizning orangizda bunday bo`lmasin. Orangizda kim katta bo`lishni istasa, sizga xizmatkor bo`lsin. **27** Orangizda kim birinchi bo`lishni istasa, sizga qul bo`lsin. **28** Zero Inson O`g`li ham O`ziga xizmat qildirish uchun emas, balki O`zi xizmat qilish va O`z jonini fido qilib, ko`plarni qutqarish uchun kelgan.

## Isoning ikki ko`rni sog`aytirishi

**29** Ular Yerixo shahridan jo`nayotganlarida, ko`p xalq Isoning orqasidan ergashib bordi. **30** Yo`l chekkasida o`tirgan ikki ko`r Iso ularning oldidan o`tib borayotganini eshitgach: - Ey Hazrat, Dovud O`g`li, bizlarga rahm qil! - deb baqira boshladilar. **31** Xaloyiq ularni jim bo`lishga majbur qilsada, lekin ular ovozlarini yanada balandroq qilib: - Ey Hazrat, Dovud O`g`li, bizlarga rahm qil! - deb yolvordilar. **32** Iso to`xtab, ularni yoniga chaqirdi-da: - Sizlar Mendan nima istaysizlar? - deb so`radi. **33** Ular: - Hazrat, ko`zlarimiz ochilsin! - deyishdi. **34** Isoning ularga rahmi kelib, ko`zlariga qo`l tegizdi. Shu onda ularning ko`zlari ochilib ketdi. Ular Isoning ortidan ergashdilar.

## Isoning Quddusga tantanali kirishi

**21:1** Quddusga yaqinlashishib, Zaytun tog`i etagidagi Baytfagiya qishlog`iga yetib kelishdi. Iso ikki shogirdini yana yo`lga solib: **2** “Qarshingizdagi qishloqqa boringlar, shu zahot bog`lab qo`yilgan urg`ochi eshakni va uning yonida xo`tikni ko`rasizlar. Ularni yechib, Mening oldimga keltiringlar. **3** Agar kimdir sizga biror nima desa, “Bular Rabbimizga kerak, U ko`p o`tmay ularni qaytarib yuboradi”, - deb javob beringlar”, - dedi. **4** Bu sodir bo`lganlarning hammasi payg`ambarga vahiy bo`lgan ushbu oyat bajo kelishi uchun ro`y berdi: **5** “Sion qiziga aytingizkim: Bir mocha eshakka minib, Xo`tikka mingashib kamtarona, Sening Podshohing kelar yoningga”. **6** Shogirdlar yo`lga tushib, Iso ularga buyurganiday qildilar. **7** Eshak bilan xo`tikni keltirib, ularning ustiga kiyimlarini yukladilar. Iso esa minib oldi. **8** Xalqning ko`pchilik qismi o`z kiyimlarini yo`lga poyandoz qildi. Ba`zilari esa daraxt shoxlarini kesib, yo`lga to`shadilar. **9** Oldda va orqada yurayotgan xaloyiq: “Dovud O`g`li mangu yashasin! Xudovand nomidan Kelayotgan muborak! Ko`klardan najot yuborgil!”? deb hayqirishar edi. **10** Iso Quddusga kirib kelganda, butun shahar: “Bu kim bo`ldi?” - deb harakatga keldi. **11** Xaloyiq esa: “Bu Jalilaning Nosira shahridan bo`lgan Iso payg`ambar!” - deb ta`kidladi.

## Isoning sotuvchilarni ma`baddan quvishi

**12** Iso Xudo ma`badiga kirib, ma`badda oldi-sotdi qilayotgan hammani quvib chiqardi. Sarroflarning xontaxtalarini va kaptar sotuvchilarning kursilarini ag`darib yubordi. **13** Iso ularga: - Tavrotida: “Mening uyim ibodat uyi atalgay”, - deb yozilgan. Sizlar esa uni qaroqchilar uyasiga aylantirib yuboribsizlar! **14** Ma`badda Isoning oldiga ko`rlar va cho`loqlar keldi. U esa ularga shifo berdi. **15** Lekin oliy ruhoniylar va ulamolar Isoning qilayotgan ajoyib ishlarini hamda ma`badda: “Dovud O`g`li mangu yashasin!” deb hayqirayotgan bolalarni ko`rib, darg`azab bo`ldilar. **16** - Bular nima demoqdalar, eshityapsanmi? - deyishdi Unga. Iso ularga: - Ha! - dedi. - Nahotki sizlar: “Go`dak va chaqaloqlar og`zidan Sen madhiya yaratding”, - degan oyatni hech qachon o`qimagan bo`lsangiz?

**17** So`ng Iso ularni qoldirib, shahardan chiqdi va Baytaniyaga borib, u yerda tunadi.

### Qurib qolgan anjir daraxti

**18** Ertalab Iso shaharga qaytib kelayotganda och qoldi. **19** Yo`l chetida bir anjir daraxtini ko`rib, uning yoniga keldi. Iso barglardan boshqa hech narsa topmay, daraxtga: - Bundan keyin senda abadiy meva bitmasin! - dedi. Anjir daraxti esa shu onda qurib qoldi. **20** Buni ko`rgan shogirdlar hayratga tushib: - Qanday qilib anjir daraxti darhol qurib qoldi? - dedilar. **21** Iso ularga javoban: - Sizlarga chinini aytayin, - dedi, - Agar ishonchingiz qat iy bo`lib, shubhalanmasangiz, bu anjir daraxti bilan sodir bo`lganni ado etish u yoqda tursin, hatto bu toqqa: “Ko`taril-da, dengizga otil”, - desangiz, aytganingiz bo`ladi. **22** Sizlar ibodat qilib, ishonch bilan nimaiki so`rasangiz, erishasizlar.

### Isoning vakolati haqida savol

**23** Iso ma badga kirib ta lim berayotganda, oliy ruhoniylar va xalq oqsoqollari Uning oldiga kelib: - Sen bu ishlarni qanday huquq bilan qilyapsan? Senga bunday vakolatni kim bergan? - deb so`radilar. **24** Iso ularga javob berib dedi: - Men ham sizga bir savol berayin. Agar Menga javob bersangizlar, shunda Men ham bu ishlarni qanday vakolat bilan qilayotganimni sizlarga aytaman. **25** Yahyo payg`ambar odamlarni suvda tavba qildirish uchun kimdan vakolat olgan edi? Xudodanmi yoki insondanmi? Ular esa o`zaro mulohaza yurita boshladilar: “Agar Xudodan desak, U bizlarga: “Nega unga ishonmadingiz?” - deb aytadi. **26** Agar insondan desak, xalqdan qo`rqish kerak, chunki xalqning bari Yahyoni payg`ambar deb hisoblaydi-ku”. **27** Nihoyat Isoga: - Bilmaymiz, - deb javob berdilar. Iso esa ularga: - Men ham bularni qanday vakolat bilan qilayotganimni sizga aytmayman, - dedi.

### Ikki o`g`il haqida masal

**28** “Sizlarning fikringiz qanday? Bir odamning ikki o`g`li bor ekan. U birinchisiga kelib: - O`g`lim, bugun borib uzumzorimizda ishla, - debdi.

**29** Ammo u: - Istamayman! - deb soʻz qaytaribdi. Keyin pushaymon boʻlib, boribdi. **30** U odam ikkinchi oʻgʻliga kelib, yana shunday debdi. Bunisi javob berib: - Xoʻp xoʻjayin, boraman, - debdi-yu, lekin bormabdi. **31** Ikkovidan qaysi biri otasining xohishini bajo keltirgan boʻladi?” Isoga: “Birinchisi”, - dedilar. U ularga: “Sizlarga chinini aytayin, - dedi. - Sayoqlaru fohishalar Xudoning Shohligiga sizlardan oldin erishmoqdalar. **32** Chunki Yahyo paygʻambar sizning oldingizga toʻgʻri yoʻlni oʻrgatib keldi va sizlar unga ishonmadingiz, sayoqlar va fohishalar esa ishondi. Sizlar-chi, buni koʻrgandan keyin ham pushaymon qilmadingiz, ishonmadingiz”.

### Yovuz bogʻbonlar haqida masal

**33** “Endi boshqa bir masalni eshiting: bir yer egasi bor ekan. U uzumzor yaratib, atrof-tevaragini panjara bilan oʻrab, ichida iskanja va qoʻriqchi minorasi quribdi-da, uzumzorni bogʻbonlarga ijaraga tashlab, oʻzi vaqtincha boshqa mamlakatga ketibdi. **34** Hosil mavsumi yaqinlashgach, oʻzining mahsulini olish uchun bogʻbonlarning oldiga xizmatkorlarini yuboribdi. **35** Bogʻbonlar esa uning xizmatkorlarini tutishibdi va kimini urib, kimini oʻldirib, kimini esa toshboʻron qilishibdi. **36** Bogʻ egasi bu gal avvalgidan ham koʻproq boshqa xizmatkorlarini yuboribdi. Bogʻbonlar esa ular bilan ham shunday qilishibdi. **37** Oxirida bogʻ egasi: - Oʻgʻlimni hurmat etarlar, - deb ularning oldiga oʻz oʻgʻlini yuboribdi. **38** Lekin bogʻbonlar oʻgʻlini koʻrib, bir-biriga: - Bu merosxoʻr-ku, qani uni oʻldirib, merosiga ega boʻlaylik, - deyishibdi. **39** Uni tutib, uzumzordan tashqariga chiqarib, oʻldirishibdi. **40** Shunday qilib, uzumzorning egasi qaytib kelganda, bu bogʻbonlarni nima qilar ekan?” **41** Tinglayotganlar Isoga: “Bu yovuz odamlarni yovuzlarcha yoʻq qilib, uzumzorini esa mavsumida hosilini terib turadigan boshqa bogʻbonlarga ijaraga beradi”, - dedilar. **42** Iso ularga dedi: “Nahotki siz Zaburdagi bu soʻzni hech oʻqimagan boʻlsangizlar? “Binokorlar keraksiz deb tashlagan tosh Naq binoning peshtoqidan joy oldi. Bu Xudovand irodasi tufaylidir, Bizga esa ajoyibot timsolidir”. **43** Shuning uchun sizlarga aytamanki, Xudoning Shohligi sizdan olinib, tegishli hosilini yetishtiruvchi xalqqa beriladi. **44** Kimki bu toshga yiqilsa, parchalanib ketadi. Tosh kimning ustiga tushsa, uni ezib

yuboradi”. **45** Oliy ruhoniylar va farziylar Isoning masallarini tinglagan sayin, ular o`zлари haqida aytilganini payqadilar. **46** Ular Isoni qo`lga tushirishga intilayotgan bo`lsalar-da, xalqdan qo`rqar edilar. Chunki xalq Isoni payg`ambar deb hisoblar edi.

### Nikoh to`yi haqida masal

**22:1** Iso masallar bilan gapini davom ettirib, xalqqa xitoban dedi: **2** “Osmon Shohligi o`zining o`g`liga nikoh to`yi qilgan bir podshohga o`xshaydi. **3** Podshoh to`yga taklif etilganlarni chaqirish uchun xizmatkorlarini yuboribdi. Ular esa kelishni istamabdilar. **4** Podshoh yana boshqa xizmatkorlarini yuborib: - Taklif etilganlarga aytinglarki, men ziyofat dasturxonini tayyorlab qo`ydim, ho`kizlaru bo`rdoqilarim so`yildi, hammasi tayyor. To`yga kelaveringlar! - debdi. **5** Biroq ular yana nazarga ilmay, biri o`zining dalasiga, boshqasi bozor-o`charga ketibdi. **6** Qolganlar esa podshoh xizmatkorlarini tutib, xo`rlab, o`ldirishibdi. **7** Podshoh buni eshitib, g`azablanibdi. Qo`shinlarini yuboribdi-da, qotillarni tig`dan o`tkazib, shaharlarini kulga aylantiribdi. **8** Keyin u qolgan xizmatkorlariga: - Nikoh to`yi tayyor, lekin taklif etilganlar bunga munosib emas ekanlar. **9** Shuning uchun chorrahalariga borib, kimni topsangizlar, to`yga chaqiringlar, - deb buyuribdi. **10** Bu xizmatkorlar yo`lga chiqib, uchratganlarining hammasini - yomonlarni ham, yaxshilarni ham to`plashibdi. To`yxona mehmonlarga to`lib ketibdi. **11** Podshoh mehmonlarni ko`rish uchun kirganda, u yerda nikoh kiyimida kiyinmagan bir odamni ko`ribdi **12** va undan: - Do`stim, nikoh kiyimisiz bu yerga qanday kirding? - deb so`rabdi, u indamabdi. **13** Shunda podshoh malaylariga buyruq berib: - Uning qo`l-oyoqlarini bog`lab, tashqariga, qorong`ilikka tashlanglar. U yerda yig`i-sig`i va ohu voh bo`ladi, - debdi. **14** Shunga o`xshab, Xudo da`vat etganlar ko`p, ammo tanlanganlar ozdir”.

### Xudoning haqi Xudoga...

**15** Shundan keyin farziylar borib, Isoni U aytadigan biron so`zi orqali ilintirish chorasini maslahatlashib oldilar. **16** Ular o`z shogirdlarini Hirod tarafdorlari bilan birga Isoning oldiga yuborishdi. Bular Isoga: - Ustoz, -

deyishdi, - Biz bilamizki, Sen haqiqatgo`ysan va Xudoning haq yo`lini o`rgatib yuribsan. Kimlargadir ma`qul bo`lishni o`ylab o`tirmaysan, hech kimni yuz-xotir qilmaysan ham. **17** Endi bizlarga ayt-chi, Sening fikring qanday? Qaysarga soliq to`lash dinga muvofiqmi, yoki yo`qmi? **18** Lekin Iso ularning shumligini bilib: - Munofiqlar! - dedi, - Nega Meni sinab ko`rmoqchisizlar? **19** Qani, Menga soliqqa to`lanadigan tangani ko`rsatinglar-chi. Ular Isoga bir dinor keltirgach, **20** - Bu surat va yozuv kimniki? - deb so`radi. **21** - Qaysarniki, - dedilar. - Unday bo`lsa, Qaysarning haqini Qaysarga, Xudoning haqini Xudoga beringlar, - dedi Iso. **22** Buni eshitganlarida hayron bo`ldilar va Isoning oldidan uzoqlashdilar.

### Qiyomat haqida savol

**23** Qiyomat yo`q, deb aytadigan sadduqiylar o`sha kuni Isoning oldiga kelib, **24** Unga savol berdilar: - Ey Ustoz! Muso payg`ambar deganki: “Agar kim farzand ko`rmasdan dunyodan o`tsa, ukasi uning xotinini nikohiga olib, akasining zurriyotini tiklasin”. **25** Bizda yetti aka-uka bor edi. Birinchisi uylanib, farzand ko`rmay qazo qildi, xotini esa ukasiga qoldi. **26** Ikkinchi, uchinchi, hatto yettinchigacha hammaning boshiga shu ko`rgilik tushdi. **27** Hammadan keyin xotin ham o`ldi. **28** Shunday qilib, u qiyomatda yettovidan qaysi birining xotini sanalar ekan? Chunki u hammasiga xotin bo`lgan edi-ku. **29** Iso ularga javob berib dedi: - Siz Muqaddas Kitobni ham, Xudoning qudratini ham bilmaganingizdan adashyapsizlar. **30** Chunki oxiratda na uylanadilar va na erga tegadilar, balki osmondagi Xudo farishtalariga o`xshaydilar. **31** O`liklarning qayta tirilishiga kelsak, Xudoning sizlarga yo`llaganini hech o`qimagansizmi? **32** “Men Ibrohimning Xudosi, Is`hoqning Xudosi va Yoqubning Xudosiman”, - degan edi U. Xudo esa o`liklarning emas, tiriklarning Xudosidir. **33** Xalq buni eshitib, Iso ta`limotiga mahliyo bo`ldi.

### Eng buyuk amr

**34** Iso sadduqiylarni jim qilib qo`yganini farziylar eshitgach, bir joyga to`plandilar. **35** Ulardan Tavrot tafsirchisi bo`lgan birisi Isoni sinash



niyatida Undan: **36** - Ustoz, Tavrotning qaysi amri buyuk? - deb so`radi. **37** Iso unga: - “Egang Xudovandni butun qalbing bilan, butun joning bilan va butun onging bilan sevgin”. **38** Bu - birinchi va eng buyuk amr. **39** Ikkinchisi esa shunga o`xshashdir: “O`zgani o`zing kabi sevgin”. **40** Butun Ilohiy Buyruq va payg`ambar oyatlarining hammasi ham mana shu ikki amrga tayanadi.

### Masih kimning o`g`li?

**41** Farziylar yig`ilishganda, Iso ulardan so`radi: **42** - Masih haqida qanday fikrlaringiz bor? U kimning o`g`li? - Dovudning o`g`li-da, - deb javob berdilar. **43** Iso ularga dedi: - U holda, qanday qilib Dovud ilohiy ilhom bilan Masihni Rabbim deb atagan? Mana, Dovud nima degan: **44** “Xudovand mening Rabbimga aytdi: Yovlaringni oyoqlaring ostiga yiqitmaganimcha, Sen Mening o`ng tomonimda o`ltirib turgin”. **45** Demak, Dovud Uni Rabbim deb atagan bo`lsa, qanday qilib U Dovudning o`g`li bo`ladi? **46** Va hech kim Isoga bir og`iz so`z javob berolmadi. O`sha kundan boshlab yana hech kim Undan biron gap so`rashga jur`at etmadi.

### Soxta va chin dindorlik

**23:1** Undan keyin Iso xaloyiqqa va shogirdlariga xitob qilib, dedi: **2** “Ulamolar va farziylar Muso minbarida o`tiribdilar. **3** Shu bois ular sizga nimani bajarishni amr etsalar, bajo keltiringlar. Aytganini qiling, lekin qilganini qilmang! Chunki ular o`z aytganlarini bajarmaydilar. **4** Ular og`ir va ko`tarib bo`lmaydigan yuklarni insonlar yelkasiga tashlab qo`yadilar, lekin o`zlari bu yuklarga barmoq tegizishni ham istamaydilar. **5** Ular butun ishlarini insonlarga ko`rinish uchun qiladilar. Duo qutilarini yirikroq, kiyimlarining gajimlarini uzunroq qiladilar. **6** Shuningdek, ziyofatlarda to`rda va ibodatxonalarda hurmatli o`rinda o`tirishni, **7** xalq yig`inlarida alik olishni va odamlar tomonidan “Ustozimiz, Ustozimiz!” deb olqishlanishni yaxshi ko`radilar. **8** Biroq sizlar ustoz deb atalishga ko`nmang. Chunki sizning birgina Ustozingiz bor, U ham bo`lsa - Masihdir. Sizlar esa hammalaringiz birodarsizlar. **9** Yer yuzida hech kimni

o`zingizga ota deb ham atamanglar. Chunki sizning birgina Otangiz bor, U ham bo`lsa - samoviy Otangizdir. **10** Rahbar deb ham nom olmanglar. Chunki sizlarning birgina Rahbaringiz bor - U Masihdir. **11** Orangizdagi kattangiz sizlarga xizmatda bo`lsin. **12** Zero kim o`zini yuqori qo`ysa, pasaytiriladi. Kim o`zini past olib yursa, ulug`lanadi”.

## Din arboblari ta`na qilish

**13** “Ey ulamoyu farziylar, munofiqlar! Osmon Shohligini insonlarga bekitib qo`yganingiz uchun holingizga voy! O`zlaringiz ham unga kirmayapsizlar, kirmoqchi bo`lganlarga ham yo`l qo`ymayapsizlar. **14** Ey ulamoyu farziylar, siz munofiqlarning holiga voy! Siz beva ayollarning uylarini shilib, xo`ja ko`rsinga uzoq duo o`qiysizlar. Shunga yarasha og`irroq jazo olasizlar. **15** Ey ulamoyu farziylar, siz munofiqlarning holiga voy! Sizlar loaqal biror-bir kishini o`z diningizga kiritish uchun dengizlaru qit`alarni aylanib chiqasizlar. Lekin buni amalga oshirib bo`lgach esa, uni o`zingizdan ikki barobar yomonroq do`zaxi qilasizlar. **16** Ey ko`r peshvolar, holingizga voy! Sizlar: “Ma`bad haqiga ichilgan qasam o`tmaydi, lekin ma`baddagi oltin haqiga ichilgan qasam bajarilishi shart”, deysiz. **17** Hoy nodonu ko`rlar! Qaysi biri buyukroq: ma`badning oltinimi, yoki oltinni muqaddas qilgan ma`badning o`zimi? **18** Shuningdek, sizlar yana: “Qurbongoh haqiga ichilgan qasam o`tmaydi, lekin qurbongohdagi qurbonlik haqiga ichilgan qasam bajarilishi shart”, - deysizlar. **19** Hoy nodonlar, ko`rlar! Qaysi biri buyukroq: qurbonlikmi yoki qurbonlikni muqaddas qilgan qurbongohmi? **20** Axir, qurbongoh haqiga qasam ichgan, ham qurbongohning o`zi, hamda undagi barcha narsalar haqiga qasam ichgan bo`ladi. **21** Ma`bad haqiga qasam ichgan esa, ham ma`badning o`zi, hamda ma`badda yashaydigan Xudo haqiga qasam ichgan bo`ladi. **22** Osmon haqiga qasam ichgan esa, ham Arshi A`lo, hamda Arshi A`lodagi Xudoning O`zi haqiga qasam ichgan bo`ladi. **23** Ey ulamoyu farziylar, siz munofiqlarning holiga voy! Sizlar yalpiz, arpabodiyon va zira qatori oshko`kdan ushr berib turasiz-u, lekin Ilohiy Buyruqning nihoyatda muhim amrlari bo`lgan haqqoniyat, marhamat va sadoqatga esa e`tibor bermay qo`ydingizlar. Bularning birini bajara turib, ikkinchisini ham tashlab qo`ymasligingiz kerak edi. **24** Sizlar chivinni pesh qiluvchi, ammo

tuyani yutib yuboradigan ko`r peshvolarsiz! **25** Ey ulamoyu farziylar, siz munofiqlarning holiga voy! Sizlar kosayu laganning sirtini tozalaysiz, ammo ularning ichi o`g`rilik va badnafslikka to`lib-toshib yotibdi. **26** Ey so`qir farziy! Sen avvalo kosa va laganning ichini tozalab ol, shunda ularning tashi ham toza bo`ladi. **27** Ey ulamoyu farziylar, siz munofiqlarning holiga voy! Sizlar tashqaridan chiroyli ko`rinadigan, lekin ichi o`liklarning suyaklari va har xil qabihliklarga to`la, ohaklangan qabrlarga o`xshaysizlar. **28** Garchi tashqaridan insonlarga mo`min ko`rinsangizlar ham, lekin ichlaringiz ikkiyuzlamachilik va yomonlikka to`ladir”.

### Soxta dindorlar oladigan jazo

**29** “Ey ulamoyu farziylar, siz munofiqlarning holiga voy! Chunki sizlar payg`ambarlarga maqbara qurib, aziz-avliyolarning yodgorliklarini bezab yuribsizlar. **30** “Agar ota-bobolarimiz davrida yashaganimizda, biz payg`ambarlarning qonini to`kishda ularga hamkorlik qilmas edik”, - deysizlar. **31** Bu bilan siz o`zingizni o`zingiz inkor etib, payg`ambarlarni qatl qilganlarning o`g`illari ekaningizni o`zingiz tasdiqlab turibsiz. **32** Qani, ota-bobolaringiz boshlagan ishni bitirib qo`ymaysizlarmi?! **33** Hoy ilonlar, zaharli ilon zotlari-yey! Jahannam jazosidan qanday qilib qutularkansizlar? **34** Ana shu sababdan Men sizga qanchadan-qancha payg`ambaru donishmandu ulamolarni yuborib turaman. Sizlar esa ulardan kimini o`ldirasizlar, kimini xochga mixlaysizlar, kimini esa ibodatxonalariningizda qamchilab shahardan-shaharga quvg`in qilasizlar. **35** Shu yo`sin solih kishi bo`lgan Hobilning qonidan tortib, ma`bad bilan qurbongoh oralig`ida sizlar o`ldirgan Baraxiya o`g`li Zakariyoning qonigacha, yer yuzida to`kilgan butun begunoh qonlar sizning bo`yningizda! **36** Ha, sizlarga chinini aytaman: ushbu gunohlarning hammasi shu naslning bo`yniga tushadi”.

### Isoning Quddus uchun nolasi

**37** “O, Quddus, Quddus! Payg`ambarlarni o`ldiruvchi va huzuringga yuborilganlarni toshbo`ron qilguvchi shahar! Tovuq o`z jo`jalarini

qanotlari ostida qanday to`plasa, Men ham sening bolalaringni necha bor shunday to`plamoqchi bo`ldim, sizlar-chi, istamadingiz. **38** Mana, sizning uy-joyingiz huvullab qoladi. **39** Sizga shuni aytib qo`yay: “Xudovand nomidan Kelayotgan muborak”, - deb xitob qilmaguningizcha, Meni qaytib ko`rmaysizlar”.

## Iso oxirzamon haqida

**24:1** Iso ma baddan chiqib ketayotganda, shogirdlari Uning yoniga kelib, diqqatini ma badning binolariga qaratmoqchi bo`lishdi. **2** Iso ularga: “Bularning hammasini ko`ryapsizmi? Sizlarga chinini aytayin: bu yerda biror g`isht butun qolmaydi, hammasi vayron bo`ladi”, - dedi. **3** Iso bir O`zi Zaytun tog`ida o`tirgan vaqtda, shogirdlari Uning yoniga kelib, so`rashdi: “Bizlarga ayt-chi, bu voqealar qachon yuz beradi? Sening kelishing va oxirzamon yaqinlashganini ko`rsatadigan belgi qanday bo`ladi?” **4** Iso javob berib ularga dedi: “Hech kim sizlarni yo`ldan ozdirmasligi uchun ehtiyot bo`linglar. **5** Chunki talay kishilar Mening nomim bilan kelib: “Men Masih bo`laman”, - deb ko`plarni yo`ldan ozdiradi. **6** Shuningdek, yiroq-yaqindan urush xabarlarini eshitasizlar. Ammo cho`chib vahimaga tushmangiz! Hamma narsa Xudo taqdir etganidek sodir bo`lishi lozim. Ammo bu hali so`nggi nihoya emasdir. **7** Xalq xalqqa qarshi, podshohlik podshohlikka qarshi ko`tariladi. Ayrim joylarda qahatchiliklar, o`latlar, zilzilalar bo`ladi. **8** Bularning bari esa bamisli to`lg`oqning boshidir. **9** O`shanda sizlarni qiynash va o`ldirish uchun tutib beradilar. Mening nomim tufayli barcha xalqlar sizlardan nafratlanadi. **10** O`shanda ko`plar vasvasaga tushib, bir-birini tutib beradi, bir-biridan nafratlanadi. **11** Ko`pdan-ko`p soxta payg`ambarlar paydo bo`lib, ko`plarni yo`ldan uradi. **12** Yovuzlik avjga chiqishi tufayli ko`pchilikning sevgisi soviydi. **13** Lekin oxirigacha chidagan qutuladi. **14** Xudo saltanati to`g`risidagi Injil Xushxabari hamma xalqlarga dalolat bo`lish uchun jahon bo`ylab targ`ib qilinadi va o`shandagina so`ng bo`ladi”.

## Buyuk musibat va Isoning qayta kelishi

**15** “Shunday qilib, Doniel payg`ambar karomat qilib aytgan “dahshatli razolat” muqaddas joyda turganini ko`rganingizda (o`qigan o`zi tushunsin!) **16** Yahudiyada bo`lganlar tog`larga qochishsin. **17** Tomning ustida turganlar uyidan anjomlarini olish uchun pastga tushmasin. **18** Dalada bo`lganlar esa to`nini olgani qaytib kelmasin. **19** U kunlarda homilador va emizuvchi ayollarning holiga voy! **20** Qochishingiz qishga yoki dam olish kuniga to`g`ri kelmasligi uchun ibodat qilinglar. **21** Chunki o`shanda dunyo boshlanishidan to hozirgacha sodir bo`lmagan va qaytib sodir bo`lmaydigan buyuk musibat bo`ladi. **22** Agar o`sha kunlar qisqartirilmaganida edi, hech bir jonzod omon qolmasdi. Lekin tanlangan kishilar uchungina u kunlar qisqartiriladi. **23** Agar o`shanda kimdir sizga: “Masih mana bu yerda”, yoki “U yerda”, - deb aytsa, ishonmanglar. **24** Chunki soxta masihlar va soxta payg`ambarlar paydo bo`lib, ilojini topsalar, hatto tanlangan kishilarni ham yo`ldan ozdirish uchun g`aroyibot va mo`jizalar ko`rsatadilar. **25** Mana, Men sizlarga oldindan aytib qo`ydim. **26** Shunday qilib, agar sizlarga: “Mana, U sahroda”, - deb aytsalar, chiqmanglar. “Mana, U berk xonalarda”, - deb aytishsa ham, ishonmanglar. **27** Chunki Inson O`g`lining kelishi xuddi sharqda chaqnab, hatto g`arbda ham barchaga ko`rinuvchi chaqmoqday bo`ladi. **28** Murda qayerda bo`lsa, kalxatlar ham o`sha yerda to`planadi. **29** O`sha kunlarning musibatidan so`ng, alhol quyosh tutilib, oy xiralanadi. Yulduzlar osmondan tushib, samoviy kuchlar larzaga keladi. **30** O`shanda Inson O`g`lining alomati osmonda namoyon bo`ladi. Yer yuzidagi barcha qabilalar uvvos tortib yig`laydilar, Inson O`g`li osmon bulutlari uzra buyuk qudrat va shon-shuhrat ila kelayotganini ko`radilar. **31** U mahobatli karnay tutgan farishtalarini yuboradi. Ular esa Uning tanlagan kishilarini osmonning bir burchidan boshqa burchigacha, to`rt tomondan to`plab keladilar”.

## Hushyor bo`lib turish haqida

**32** “Anjir daraxtidan ibrat olinglar. Uning shoxlari ko`karib, barg chiqarayotganidan yoz yaqinlashganini bilasizlar. **33** Xuddi shunday,

sizlar ham bularning hammasini ko`rgach, bilingki, U yaqindir, eshik oldida turibdi. **34** Sizlarga chinini aytayin: bu nasl o`tmasdanoq, bularning hammasi sodir bo`ladi. **35** Yeru osmon bitar, lekin Mening so`zlarim bitmas. **36** U kun va u soat haqida birgina Otamdan boshqa hech kim bilmaydi, osmondagi farishtalar ham bilmaydi. **37** Nuh payg`ambar davrida qanday bo`lgan bo`lsa, Inson O`g`li kelishida ham shunday bo`ladi. **38** To`fongacha bo`lgan kunlarda, to Nuh payg`ambar kemaga kirgan kunigacha yeb-ichdilar, uylandilar, turmushga chiqdilar. **39** Ular bo`lg`usi ofatdan bexabar yurganda, to`fon kelib, hammasini qirib tashladi. Inson O`g`lining kelishi ham xuddi shunday bo`ladi. **40** O`shanda ikki kishi dalada bo`ladi; biri olinadi, biri qoldiriladi. **41** Tegirmon tortayotgan ikki ayol bo`ladi; biri olinadi, biri qoldiriladi. **42** Shuning uchun hushyor bo`lib turinglar, chunki Rabbingiz qaysi soatda kelishini bilmaysizlar. **43** Lekin shuni bilib qo`yinglarki, o`g`ri tunning qay vaqtida kelishini agar uy egasi bilganda, bedor turib, uyiga lahim qazilishiga yo`l qo`ymas edi. **44** Shunga o`xshab, sizlar ham tayyor bo`lib turinglar. Chunki Inson O`g`li sizlar o`ylamagan soatda kelib qoladi”.

### Yaxshi va yomon xizmatkor haqida masal

**45** “Qul-cho`rilarga rizq-ro`zni o`z vaqtida berib turish uchun xo`jayin ularga boshliq qilib qo`ygan ishonchli va aqlli xizmatkor kimdir? **46** Xo`jayini kelganda, uni shularni bajarib turgan holda ko`rsa, u xizmatkor qanday baxtlidir! **47** Sizlarga chinini aytayin: o`zining butun mol-mulki ustidan uni nazoratchi qilib qo`yadi. **48** Agarda yomon niyatli xizmatkor o`z ko`nglida: “Xo`jayinim yaqin orada kelmaydi”, - deb o`ylab, **49** o`rtoqlarini urib, ichkilikbozlar bilan birga yeb-ichishni boshlasa, **50** u xizmatkorning xo`jayini kutmagan bir kunda, o`ylamagan bir soatda kelib qoladi-yu, **51** uni tilka-pora qilib, boshiga ikkiyuzlamachilar kunini soladi. U yerda yig`i-sig`i va ohu vohlar bo`ladi”.

### O`n kelin dugonasi haqida masal

**25:1** “O`sha vaqtda Osmon Shohligini o`zlarining chiroqlarini yoniga olishib, kuyovni qarshilagani chiqqan o`n kelin dugonasiga o`xshatsa

bo`ladi. **2** Ulardan beshovi es-hushli, beshovi esa ovsar ekan. **3** Ovsarlari chiroqlarini olib, o`zlari bilan yog` olmabdilar. **4** Es-hushlilari esa chiroqlari bilan birga idishlarda yog` ham olibdilar. **5** Kuyov kechikkani sababli, hammalari mudrab, uxlab qolishibdi. **6** Tunning yarmida birdaniga ovoz yangrabdi: - Ana, kuyov kelyapti, uni qarshilagani chiqinglar! **7** Shunda qizlarning hammasi turib, chiroqlariga yopishibdi. **8** Ovsarlari es-hushlilarga: - Chiroqlarimiz o`chib boryapti, bizlarga yog`laringizdan beringlar! - deyishibdi. **9** Es-hushlilar javob berib: - Yo`q, bizlarda ham, sizlarda ham yog` yetmay qolmasin. Yaxshisi, siz baqqollarning oldiga borib, o`zlaringizga yog` sotib olinglar, - deyishibdi. **10** Ular yog` sotib olgani ketishganda, kuyov kelib qolibdi. Tayyor turgan qizlar kuyov bilan birga to`yxonaga kirib, orqalaridan eshiklar yopilibdi. **11** Bir muddatdan keyin qolgan qizlar kelib: - Hoy Egam, hoy Egam, eshikni oching, bizlar keldik! - deyishibdi. **12** Lekin U ularga javob berib: - Men sizga rostini aytsam, sizlarni tanimayman, - debdi. **13** Shunday qilib, hushyor bo`lib turinglar, chunki siz Inson O`g`li keladigan aniq kunni ham, soatni ham bilmaysizlar”.

### Omonat pul haqida masal

**14** “Yana oxirzamon bir odam safarga jo`nab, xizmatkorlarini chaqirib, o`z mol-mulkini ularga omonatga berganiga o`xshaydi. **15** U odam har bir kishiga o`z qobiliyatiga yarasha: biriga besh, biriga ikki, biriga bir yombidan berib, jo`nab ketibdi. **16** Beshta yombi olgan o`sha zahoti borib, pulini ishga solib, yana besh yombi orttiribdi. **17** Shunga o`xshab, ikki yombi olgan ham yana ikki yombi orttiribdi. **18** Bitta yombi olgan esa borib, chuqur qazib, xo`jayinining pulini yashirib qo`yibdi. **19** Ancha vaqtdan so`ng boyagi xizmatkorlarning xo`jayini qaytib kelib, ulardan hisobot so`rabdi. **20** Besh yombi olgan boshqa besh yombini ham olib kelib: - Xo`jayin! Menga besh yombi bergandingiz, mana men ularga qo`shib yana besh yombi orttirdim, - debdi. **21** Xo`jayini unga: - Barakalla, yaxshi va sodiq xizmatkor ekansan. Sen kichik bir ishda ham sodiq bo`lganing uchun, endi seni katta ishlarga munosib ko`raman. Xo`jayiningning shodligini baham ko`r, - debdi. **22** Ikki yombi olgan ham kelib: - Xo`jayin! Menga ikki yombi bergandingiz. Mana, men ularning

yoniga qo`shib yana ikki yombi orttirdim, - debdi. **23** Xo`jayini unga: - Barakalla, yaxshi va sodiq xizmatkor ekansan. Sen kichik bir ishda ham sodiq bo`lganing uchun, endi seni katta ishlarga munosib ko`raman. Xo`jayiningning shodligini baham ko`r, - debdi. **24** Bitta yombi olgan ham kelib: - Xo`jayin! Men sizning qattiqqo`l odam ekaningizni bilardim. Siz ekmagan yerdan o`rasiz, uymagan joydan xirmon ko`tarasiz. **25** Shuning uchun men qo`rqqanimdan borib, sizning yombingizni yerga yashirib qo`ydim. Mana berganingiz! - debdi. **26** Xo`jayini unga javob qaytarib: - Ey yomon va yalqov xizmatkor! - debdi. - Men ekmagan yerdan o`rishimni, uymagan joydan xirmon ko`tarishimni bilarkansan, **27** u holda pulimni sudxo`rlarga qarzga bersang bo`lmasmidi? Shunda men kelib, uni foydasi bilan qaytarib olgan bo`lar edim. **28** Endi, undan yombini olib o`n yombisi borga beringlar! **29** Chunki kimda bor bo`lsa, unga yana beriladi va u mo`lchilikda bo`ladi. Kimda yo`q bo`lsa, undan bori ham tortib olinadi. **30** Endi bu yaramas xizmatkorni tashqariga, qorong`ilikka uloqtirib yuboringlar. U yerda yig`i-sig`i va oh-vohlar bo`ladi". Bularni aytib, Iso xitob qilib dedi: "Kimning eshitar qulog`i bo`lsa, eshitsin!"

### Qiyomat-qoyim so`rog`i

**31** "Inson O`g`li O`zining ulug`vorligida, jamiki muqaddas farishtalari bilan birga kelgan paytida O`zining ulug`vor taxtiga o`tiradi. **32** Barcha xalqlar Uning huzuriga to`planadilar. Cho`pon qo`ylarni echkilardan ajratganiday, U ularni birma-bir saralab qo`yadi. **33** "Qo`ylarni" O`zining o`ng tomoniga, "echkilarni" esa chap tomoniga turg`izadi. **34** Shunda Podshoh o`ng tomondagilarga aytadi: - Ey, Mening Otamning olqaganlari, kelinglar! Dunyo yaratilganidan beri sizlar uchun meros sifatida tayyorlab qo`yilgan Shohlikni egallangiz. **35** Chunki Men och edim, Menga ovqat berdingizlar. Chanqagan edim, Menga suv ichirdingizlar. Musofir edim, Meni mehmon qildingizlar. **36** Yalang`och edim, Meni kiyintirdingizlar. Kasal edim, Meni boqdingizlar. Zindonda edim, Meni kelib ko`rdingizlar. **37** Bunga javoban solihlar Unga shunday deydilar: - Yo Rabbiiy! Qachon Sening ochligingni ko`ribmizki, yedirgan bo`lsak, yoki chanqaganingni ko`ribmizki, suv tutgan bo`lsak? **38** Qachon Sening musofir bo`lganingni ko`rib, mehmon qildik, yoki yalang`ochligingni ko`rib, kiyintirdik? **39**



Qachon biz kasal yoki zindonda bo`lganingni ko`rib, Seni yo`qlab keldik? **40** Podshoh javob berib ularga deydi: - Sizlarga chinini aytayin: sizlar Mening shu kichik birodarlarimdan biriga neki qilgan bo`lsangiz, bu Menga qilganingizdir. **41** So`ng U chap tomondagilarga ham aytadi: - Ey la natilar! Ko`zimdan yo`qoling, iblis va uning farishtalariga tayyorlab qo`yilgan abadiy olovga muftalo bo`ling! **42** Chunki Men och edim, ovqat bermadingizlar. Chanqagandim, suv tutmadingizlar. **43** Musofir edim, Meni mehmon qilmadingiz. Yalang`och edim, Meni kiyintirmadingiz. Kasal bo`ldim, zindonga tushdim, Meni kelib ko`rmadingizlar. **44** Shunga javoban ular ham: - Yo Rabbiiy! Seni qachon och, chanqagan, musofir, yalang`och, kasal yoki zindonda bo`lganingni ko`ribmizki, Senga xizmat qilmagan bo`lsak? - deb so`raydilar. **45** U javob berib ularga shunday deydi: - Sizlarga chinini aytayin: sizlar shu kichiklarning biriga qilmagan muruvvatingiz Menga qilmagan bilan barobardir. **46** Shunday qilib, bular abadiy azobga, solihlar esa abadiy hayotga noil bo`ladilar”.

### Isoni o`ldirish rejasi

**26:1** Iso hamma so`zlarini aytib bo`lgach, shogirdlariga dedi: **2** “Ikki kundan keyin Fisih bayrami bo`lishini bilasizlar. Ana, o`shanda Inson O`g`li xochga mixlash uchun tutib beriladi”. **3** Shundan keyin oliy ruhoniylar, ulamolar va oqsoqollar jamisi Kayafa ismli bosh oliy ruhoniyning hovlisida to`planishib, **4** Isoni hiyla bilan tutib o`ldirishni o`zaro maslahatlashib oldilar. **5** Ular: “Bu ish faqat bayram kunlarida bo`lmasligi kerak, yana xalq g`alayon qilmasin”, - dedilar.

### Isoga atir moy quygan ayol

**6** Iso Baytaniyada moxov Simunning uyida ekan, **7** bir ayol Uning oldiga keldi. U ganchdan yasalgan idishda juda qimmatli atir moy keltirib, Iso dasturxon oldida o`tirgan paytda Uning boshiga quydi. **8** Shogirdlari buni ko`rgach, g`azablanib: - Bu isrofgarlikning nima keragi bor? **9** Bu moyni katta bahoga sotib, pulini kambag`allarga bo`lib berish mumkin edi-ku! - deyishdi. **10** Iso aytilganlarning farqiga borib, shogirdlariga dedi: - Nega ayolni xijolatda qoldiryapsizlar? U Men uchun ezgu ish qildi. **11**

Kambag`allar har doim sizlar bilan birga, lekin Men doim sizlar bilan birga bo`lmayman. **12** Ayol bu moyni tanamga to`kib, Meni ko`mishga tayyorladi. **13** Sizlarga chinini aytayin: Injil Xushxabari dunyoning qaysi yerida targ`ib qilinsa, bu ayol ham eslanib, uning qilgan ishi yodga olinadi. **14** Shunda o`n ikki shogirdan biri bo`lgan Yahudo Ishqariyot degan kishi oliy ruhoniylarning oldiga borib: **15** - Isoni qo`lingizga tutib bersam, menga nima berasizlar? - deb so`radi. Ular Yahudoga o`ttiz kumush tanga taklif etdilar. **16** O`sha vaqtdan boshlab Yahudo Isoga xiyonat qilish uchun qulay payt poylaydigan bo`ldi.

### Qutlug` ziyofat va Isoga xiyonat

**17** Xamirturushsiz non yopiladigan Fisih bayramining birinchi kunida shogirdlar Isoning oldiga kelib so`radilar: - Senga Fisih bayrami taomini qayerda tayyorlashimizni buyurasan? **18** - Shaharga kirib falon kishining oldiga boringlar, - dedi Iso, - va unga shunday deb aytinglar: "Ustozimiz: Mening vaqt-soatim yaqinlashdi, deyapti, Fisih bayramini shogirdlarim bilan birga sening uyingda nishonlamoqchiman, deyapti". **19** Shogirdlari Iso ularga buyurganiday qilib, Fisih taomini tayyorladilar. **20** Oqshom tushgach, Iso o`n ikki shogirdi bilan dasturxon atrofiga o`tirdi. **21** Ovqatlanayotganlarida, Iso: - Sizlarga rostini aytsam, sizdan bir kishi Meni tutib beradi, - dedi. **22** Shogirdlar juda xafa bo`lib, birin-ketin Undan: - Rabbiiy, o`sha men emasmi? - deb so`ray boshladilar. **23** U esa javob qaytarib dedi: - Men bilan birga kosaga non botirib yegan Meni tutib beradi. **24** To`g`ri, Inson O`g`lining taqdiri oyatda yozilganiday ketyapti. Lekin Inson O`g`lini tutib beradigan o`sha odamning holiga voy! U odamning tug`ilmagani yaxshiroq bo`lar edi. **25** Shunda Isoga xoinlik qiladigan Yahudo so`radi: - Ustoz, meni ko`zda tutayotganing yo`qmi? - O`zing aytding, - dedi Iso. **26** Ular ovqatlanib o`tirganlarida, Iso nonni oldi, duo o`qib sindirdi va shogirdlariga tarqatib: - Olinglar, yenglar, bu Mening tanamdir, - dedi. **27** Kosani ham olib, shukrona duosini aytdi va ularga uzatib: - Bundan hammalaring ichinglar, - dedi. **28** - Chunki bu - ko`plarning gunohlari kechirilishi uchun to`kiladigan, Yangi Ahdni tasdiqlaydigan Mening qonimdir. **29** Men sizlarga shuni aytaman: Otamning Shohligida sizlar bilan yangi sharob ichadigan o`sha kungacha,

Men uzumning bu ko`z yoshidan boshqa ichmayman. **30** Keyin ular kuylab, Zaytun tog`i tomon ketdilar.

### Butrusning Isodan tonishi haqida karomat

**31** Shu orada Iso shogirdlariga dedi: - Bu tunda hammangiz Mendan yuz o`girasizlar. Chunki Tavrotda shunday yozilgan: "Men cho`ponni jarohatlayman, Qo`ylar o`zi tarqab ketadi". **32** Biroq o`lib tirilganimdan keyin, Men sizlardan oldin Jalilaga boraman. **33** Butrus javob berib Unga dedi: - Agar hamma Sendan yuz o`girsa ham, men hech qachon o`girmayman! - dedi. **34** Iso unga: - Senga rostini aytsam, shu kechayoq, xo`roz qichqirmasdan avval, sen Mendan uch marta tonasan, - dedi. **35** Butrus Unga: - Men Sen bilan birga o`lsam ham, Sendan aslo tonmayman! - dedi. Boshqa hamma shogirdlari ham shunday dedilar.

### Isoning bog`dagi ibodati

**36** Shundan keyin Iso shogirdlari bilan birga Getsemaniya degan joyga keldi va ularga: - Men nariroq borib ibodat qilgunimcha, sizlar shu yerda o`tirib turinglar, - dedi. **37** Butrus bilan Zabadiyning ikki o`g`lini O`ziga hamroh qilib olgan Iso ruhan siqilib, anduh cheka boshladi. **38** U yonidagilarga: - Mening jonim o`lim oldidaligini sezib, juda qiynalmoqda. Shu yerda qolib, Men bilan birga sergak turinglar, - dedi. **39** Bir oz nari ketib, yerga muk tushdi va ibodat qilib: - Ey Otam! Agar mumkin bo`lsa, bu zaqqum kosa Mening yonimdan o`tib ketsin. Lekin Men istagandek emas, Sen istagandek bo`lsin, - dedi. **40** U shogirdlari yoniga qaytib kelganda, ularni uxlab yotgan holda ko`rdi va Butrusga dedi: - Demak, sizlar Men bilan birga loaqal bir soatga uyg`oq tura olmadinglar. **41** Vasvasaga tushmaslik uchun hushyor bo`lib, ibodat qila turinglar. Ruh tetik, tana esa zaifdir. **42** Iso ikkinchi marta borib: - Ey Otam! Agar bu qismat Meni damiga olmay o`tib ketishi mumkin bo`lmasa, mayli, Sen xohlagandek bo`lsin, - deb ibodat qildi. **43** U qaytib kelib, shogirdlarini yana uxlab yotgan holda ko`rdi. Ularning qovoqlari salqigan edi. **44** Iso ularni qoldirib, yana uzoqlashdi va o`sha so`zlarni takrorlab, uchinchi marta ibodat qildi. **45** Shundan so`ng O`z shogirdlari yoniga kelib, ularga

dedi: - Sizlar hali ham uxlab, rohatlanib yotibsizlarmi? Mana, vaqt-soati keldi, Inson O`g`li gunohkorlar qo`liga tutib berilyapti. **46** Turinglar, ketaylik. Mana, Menga xoinlik qiluvchi ham yaqinlashib qoldi.

### Isoning hibsga olinishi

**47** Iso gapini tugatmayoq, o`n ikki shogirdidan biri bo`lgan Yahudo kelib qoldi. Uning yonida oliy ruhoniylar va xalq oqsoqollari tomonidan yuborilgan, qilich va tayoq ushlagan olomon bor edi. **48** Isoga xoinlik qiluvchi esa: “Men kimni o`psam, U O`shadir, Uni tutib olinglar”, deb ular bilan til biriktirgan edi. **49** U to`g`ri Isoning oldiga borib: - Kayfing chog` bo`lsin, Ustoz! - deb, Uni o`pdi. **50** Iso unga: - Do`stim, nima uchun kelding? - deyishi bilanoq, odamlar kelib, Isoga qo`llari bilan yopishgancha Uni ushlab olishdi. **51** Shunda Iso bilan birga bo`lganlardan biri qilichini qinidan sug`urib, qulochkashlab oliy ruhoniyning qaroliga dast soldi-da, qulog`ini uzib tashladi. **52** Lekin Iso unga: - Qilichingni joyiga qaytarib qo`y! Qilich ko`targan bari qilichdan halok bo`lur. **53** Yoki o`ylaysanki, Men Otamga iltijo qilolmaymanmi? U Menga hoziroq o`n ikki tumandan ko`proq farishtalarni yuborishi mumkin. **54** Biroq u holda bularning sodir bo`lmog`i kerakligi aytilgan oyatlar bajo bo`larmikin? **55** Shundan so`ng Iso olomonga qayrilib dedi: - Sizlar Meni hibsga olish uchun qaroqchiga qarshi chiqqandek qilichlaru tayoqlar bilan qurollanib kelibsizlar. Men bo`lsam, har kuni ma`badda ta`lim berib, sizlar bilan birga o`tirar edim, sizlar-chi, Meni qo`lga olmadinglar. **56** Lekin bularning hammasi payg`ambar oyatlari bajo kelishi uchun sodir bo`ldi. O`shanda hamma shogirdlari Isoni qoldirib, qochib ketishdi.

### Iso yahudiylarning Oliy Kengashi oldida

**57** Isoni qo`lga olganlar Uni bosh oliy ruhoniy Kayafaning huzuriga keltirdilar. U yerga ulamolar bilan oqsoqollar ham to`plandilar. **58** Butrus esa Isoga uzoqdan ergashib, oliy ruhoniyning hovlisigacha keldi. Ichkariga kirib, bu voqeaning oxirini ko`rish uchun xizmatkorlar bilan birga o`tirdi. **59** Oliy ruhoniylar, oqsoqollar va butun Oliy Kengash Isoga o`lim jazosini berish uchun Unga qarshi soxta dalillar izlashga tushdilar. **60** Anchagina

guvohlar olg`a chiqqan bo`lsa-da, yetarlicha ayblovchi dalillar topilmadi. Nihoyat, ikki soxta guvoh so`zga chiqib: **61** - Bu Odam: “Men Xudoning ma`badini buzib, uch kunda qayta tiklay olaman”, degan, - deb aytishdi. **62** Bosh oliy ruhoniy o`rnidan turib, Isoga: - Nega Sen hech javob qaytarmaysan? Ularning ayblovlariga nima deysan? - dedi. **63** Iso indamadi. Oliy ruhoniy Unga: - Barhayot Xudo haqi Senga qasam ichirayinki, bizlarga ayt: Xudoning O`g`li - Masih Senmisan? - dedi. **64** Iso unga: - O`zing aytding, - dedi. - Hatto sizlarga aytadurmanki, bundan keyin Inson O`g`li Qodir Tangrining o`ng tomonida o`ltirib, osmon bulutlari uzra kelayotganini ko`rasizlar. **65** Shunda oliy ruhoniy kiyimlarini yirtib: - U shakkoklik qilmoqda-ku! Bizlarga boshqa guvohlarning nima keragi bor? Mana endi U Xudoga shak keltirganini o`zlaringiz eshitdingizlar. **66** Sizlar nima deysizlar? - dedi. Ular javob berib: - O`limga loyiq! - deyishdi. **67** So`ng ular Isoning yuziga tupurib, Uni mushtlay boshladilar. Boshqalari esa Uni shapaloqlab: **68** - Ey Masih! Qani payg`ambarligingni ko`rsatib, aytib ber-chi, Seni kimlar uryapti ekan? - derdilar.

### Butrusning Isodan tonishi

**69** Bu vaqt Butrus tashqi hovlida o`tirib edi. Bir xizmatkor ayol uning yoniga kelib: - Sen ham jalilalik Iso bilan birga eding-ku! - dedi. **70** Lekin Butrus hammaning oldida inkor etib: - Sen bo`lmag`ur gapni aytyapsan, - dedi. **71** So`ng darvoza tomon chiqdi. Boshqa bir xizmatkor ayol ham uni ko`rib, atrofdagilarga: - Bu ham nosiralik Iso bilan birga bo`lgan! - dedi. **72** Butrus esa qasam ichganicha: - Men bu Odamni tanimayman! - deb yana tondi. **73** Bir ozdan keyin u yerda turganlar kelib, Butrusga: - Sen ulardan birining xuddi o`zisan, kaloming ham aytib turibdi, - deyishdi. **74** Lekin Butrus la`nat o`qib, qasam ichdi-da: - Men bu Odamni tanimayman! - deb turib oldi. Shu vaqt birdan xo`roz qichqirdi. **75** Isoning unga: “Xo`roz qichqirmasdanoq, sen Mendan uch marta tonasan”, - degan so`zi Butrusning esiga tushib, tashqariga chiqdi-da, achchiq-achchiq yig`ladi.

## Xoin Yahudoning halokati

**27:1** Tong otgach, oliy ruhoniylar bilan xalq oqsoqollari jamisi kengashib, Isoni o`lim jazosiga mahkum qilishga kelishdilar. **2** Isoni bog`ladilar va olib borib, viloyat hokimi Po`ntiy Pilatga topshirdilar. **3** Xoin Yahudo esa Isoning mahkum etilganini bilib, pushaymon bo`ldi va o`ttiz kumush tangani oliy ruhoniylar bilan oqsoqollarga qaytarib berib: **4** - Men xoinlik qildim, begunoh qon to`kilishida aybdorman, - dedi. Ular esa: - Bundan bizlarga nima? Yana o`zing bilasan! - deyishdi. **5** Shunda Yahudo kumush tangalarni ma`bad ichiga uloqtirib yubordi-da, u yerdan chiqib borib, o`zini osib o`ldirdi. **6** Oliy ruhoniylar tangalarni terib olib: “Bu pul qon narxidir, uni ma`badning xazinasiga qo`shish mumkin emas”, - deyishdi. **7** O`zaro kelishib, bu pulga begonalar ko`miladigan qabriston uchun Kulol Yerini sotib oldilar. **8** Shuning uchun u yer bugungacha “Qon Yeri” deb ataladi. **9** Shu yo`sin Yeremiya payg`ambarga vahiy bo`lgan ushbular bajo bo`ldi: “Isroil o`g`illari Unga baho berib qo`ygan O`ttiz kumush tangani olib, **10** Xudovand menga buyurgani kabi, Kulol Yerin sotib oldilar”.

## Iso hokim Pilat oldida

**11** Iso hokimning huzurida turdi. Hokim Undan so`radi: - Sen yahudiylarning Podshohimisan? - O`zing aytding, - dedi unga Iso. **12** Oliy ruhoniylar va oqsoqollar Uni ayblaganlarida, U hech narsa deb javob bermadi. **13** Shunda Pilat Unga: - Eshitmayapsanmi, Sening bo`yningga qancha ayblar qo`yishyapti! - dedi. **14** Lekin Iso bu gaplarga ham biron javob qaytarmadi. Hokim esa juda hayron bo`ldi. **15** Har Fisih bayramida hokim xalq istagan bir mahbusni ozod qilish odati bor edi. **16** O`sha kez qamoqda nom chiqargan Barabba ismli bandi bor edi. **17** Xalq to`plangach, Pilat ularga xitob qilib so`radi: - Sizlar kimni ozod qilishimni istaysizlar? Barabbanimi, yoki Masih atalmish Isonimi? **18** Ular Isoni ko`rolmaslikdan tutib berganlarini u bilar edi. **19** U hakamluk kursisida o`tirganda, xotinidan xabar keldi: “U solih Odam bilan sening ishing bo`lmasin. Chunki bu tunda men tushimda U tufayli ko`p azobda qoldim”. **20** Ammo oliy ruhoniylar va oqsoqollar bo`lsa, Barabbani ozod etish, Isoni esa yo`q qilishni so`rashlari uchun olomonni qayrab qo`ydilar. **21**

Hokim yana ularga xitob qildi: - Sizlar ikkovidan qay birini ozod qilishimni istaysizlar? - Barabbani! - deb javob berishdi. **22** Pilat ularga dedi: - Unda men Masih atalgan Isoni nima qilay? - Xochga mixlansin! - deyishdi bir og`izdan. **23** - U nima yomonlik qilgan ekan? - so`radi hokim. Lekin ular ovozlarini yana balandroq ko`tarib: - Xochga mixlansin! - deb qichqirishdi. **24** Pilat hech narsa yordam bermayotganini, aksincha shovshuv yanada kuchayib borayotganini ko`rgach: - Men bu solih Odamning qoni to`kilayotganidan begunohman. Bu ishni o`zlaringiz ko`rib chiqinglar! - dedi-da, olomonning ko`z oldida suv olib, qo`llarini chaydi. **25** Butun xalq bunga javoban: - Uning qoni bizlarning va bolalarimizning gardanidadir! - deyishdi. **26** Shundan so`ng Pilat ularga Barabbani chiqarib yubordi. Isoni esa savalatgandan keyin xochga mixlash uchun askarlarga topshirdi.

### Isoni haqorat qilish

**27** Shundan so`ng hokimning askarlari Isoni hukumat qarorgohiga olib borib, butun bo`linmani Uning boshiga to`pladilar. **28** Uning kiyimlarini yechib, egniga to`q qizil yaktak kiydirdilar. **29** Tikanlardan toj o`rib, boshiga kiygizdilar. O`ng qo`liga qamish berib, Uning oldida tiz cho`kkancha: “Yashavor, ey, yahudiylarning Podshohi!” - deb masxara qildilar. **30** Unga tupurganlaricha qamishni olib, boshiga urdilar. **31** Masxaralab bo`lishgandan so`ng egnidan yaktakni yechib, O`zining kiyimlarini kiydirdilar va xochga mixlash uchun olib ketdilar.

### Isoni xochga mixlash

**32** Ular chiqib ketayotganlarida, kirineyalik Simun degan kishini uchratib qoldilar. Uni Isoning xochini ko`tarib borishga majbur qildilar. **33** “Boshsuyagi” ma`nosini beruvchi Go`lgota degan joyga keldilar. **34** Shunda Isoga ichish uchun zardob aralashtirilgan sharob berdilar. Iso uni tatib ko`rgach, ichgisi kelmadi. **35** So`ng Uni xochga mixlab qo`ydilar. Kiyimlari uchun qur`a tashlab, o`zaro bo`lishib oldilar. **36** Keyin shu yerning o`zida o`tirgancha, Uni qo`riqlab turdilar. **37** Uning boshi uzra bir taxtachaga: “Yahudiylarning Podshohi Iso - Budir” degan aybnomani

yoziq qo`ydilar. **38** Iso bilan birga ikki qaroqchini ham - birini Uning o`ng tomonida, ikkinchisini esa so`l tomonida xochga mixlab qo`ydilar. **39** O`tib ketayotganlar boshlarini chayqagancha, Isoni haqoratlashardi: **40** - Hey ma badni buzib uch kun ichida tiklaydigan! O`zingni O`zing qutqar-chi! Agar Sen Xudoning O`g`li bo`lsang, qani xochdan tushib ko`r-chi! **41** Oliy ruhoniylar, ulamolar va oqsoqollar ham barchasi bunga qo`shilishib, Uni masxaralay ketdilar: **42** - Boshqalarni qutqardi, O`zini esa qutqara olmaydi! Agar U Isroilning Podshohi bo`lsa, endi xochdan tushib ko`rsin, shunda biz Unga ishonamiz. **43** U Xudoga ishonardi-ku. Agar U Xudoning azizi bo`lsa, hozir qutqarib olsin-chi! Chunki U: "Men Xudoning O`g`liman", - degan. **44** Iso bilan birga xochga mixlangan qaroqchilar ham Uni shunday so`kar edilar.

### Isoning jon berishi

**45** Tushdan boshlab soat uchgacha butun yerni qorong`ilik qopladi. **46** Soat uchlarda Iso baland ovoz bilan: - Eli, Eli, lamo shavaqtani? ya ni "Tangrim, Tangrim, nega Meni tashlab qo`yding?" - deb faryod qildi. **47** U yerda turganlardan ba`zilari buni eshitib: - U Ilyosni chaqiryapti-ku, - deyishdi. **48** Ulardan biri darhol yugurib, shimgichni olib keldi-da, uni sirkaga botirib, qamishning uchiga ilganча, Isoga ichishga uzatdi. **49** Boshqalari esa: - To`xta ko`raylik-chi, Ilyos kelib Uni qutqararmikan, - deyishdi. **50** Iso esa yana bir bor qattiq oh urib, jon berdi. **51** Shu ondayoq ma`baddagi parda yuqoridan pastgacha ikkiga bo`linib, yirtilib ketdi. Yer larzaga keldi, toshlar yorildi. **52** Qabrlar ochilib, talay rahmatli azizu avliyolarning jasadlari tirilib ketdi. **53** Ular qabrlaridan chiqib, Iso qayta tirilganidan keyin tabarruk shaharga kirib, ko`plarga ko`rindilar. **54** Isoni qo`riqlab turgan yuzboshi bilan yonidagi askarlar zilzilani va sodir bo`layotgan barcha ishlarni ko`rib, vahimaga tushdilar-da: - Haqiqatan ham bu Xudoning O`g`li ekan! - dedilar. **55** Jaliladan boshlab Isoga ergashib xizmat qilib kelgan ko`pgina ayollar ham uzoqdan qarab turgan edilar. **56** Ularning orasida magdalalik Maryam, Yoqub bilan Yusufning onasi Maryam hamda Zabadiy o`g`illarining onasi bor edi.

### Isoni ko`mish, qabrni qo`riqlash



**57** Oqshom tushgach, Arimateya shahridan boʻlgan Yusuf ismli bir boy odam keldi. Oʻzi ham Isoning shogirdi edi. **58** U Pilatning oldiga borib, Isoning jasadini soʻradi. Shunda Pilat jasadni unga berishni buyurdi. **59** Yusuf jasadni olib, uni toza kafanga oʻradi **60** va oʻzining qoyada yoʻnilgan yangi qabriga qoʻydi. Keyin qabrning ogʻziga katta bir toshni yumalatib keltirib qoʻydi-da, joʻnadi. **61** Magdalalik Maryam bilan boshqa Maryam esa shu yerda, qabrning roʻparasida oʻtirgan edilar. **62** Tayyorgarlik kunining ertasiga oliy ruhoniylar va farziylar Pilatning huzuriga toʻplanishib: **63** - Taqsir! - deyishdi, - Oʻsha aldamchi hali tirikligida: “Uch kundan keyin qayta tirilaman”, - degani esimizga tushdi. **64** Shuning uchun uch kungacha qabrni qorovullashni buyursangiz, toki Uning shogirdlari kechasi kelib Uni oʻgʻirlab ketishmasin va xalqqa: “U qayta tirildi”, - deb aytishmasin. Yoʻqsa, oxirgi aldov birinchisidan battar boʻladi. **65** Pilat ularga: - Mana, soqchilar boʻlinmasi oʻzlaringizning ixtiyoringizda. Borib, bilganingizdek qabrni qorovullanglar, - dedi. **66** Ular esa soqchilar bilan borib, qabr toshiga muhr bosib, qabrni qorovullay boshladilar.

## Isoning tirilishi

**28:1** Dam olish kunining ertasiga, yakshanba kuni tongotarda magdalalik Maryam bilan boshqa Maryam qabrni koʻrgani borishdi. **2** Shunda toʻsatdan shiddatli zilzila boʻldi. Xudovandning bir farishtasi osmondan tushdi va qabrga borib toshni agʻdarib yubordi-da, uning ustiga oʻtirdi. **3** Uning koʻrinishi yashinday, kiyimlari esa qorday oppoq edi. **4** Soqchilar boʻlsa, qoʻrquvdan titrab, joni chiqqanday boʻlishdi. **5** Farishta soʻzini ayollarga qaratib: - Sizlar qoʻrqmang! - dedi. - Xochga mixlangan Isoni izlayotganlaringizni bilaman. **6** U bu yerda yoʻq. Oʻzi aytganidek, qayta tirilib ketdi. Kelinglar, Rabbingiz yotgan joyini koʻringlar. **7** Endi tezroq borib, Uning shogirdlariga: “Iso tirildi. U sizdan oldin Jalilaga ketyapti, Uni oʻsha yerda koʻrasizlar”, - deb aytinglar. Sizlarga buni men aytdim. **8** Ayollar qabrdan shosha-pisha chiqib, katta sevinch va qoʻrquv ila yugurayugura Isoning shogirdlariga xabar bergani ketishdi. **9** Shogirdlarga bu xabarni yetkazaylik, deb ular yoʻlda ketayotganlarida, birdaniga Isoning Oʻzi ularning qarshisidan chiqib: - Salom! - dedi. Ular esa roʻbaroʻ kelib,

oyoqlariga yopishgancha Unga topina boshladilar. **10** Shunda Iso ularga: - Qo`rqmanglar! Borib birodarlarimga Jalilaga borishlarini, Meni o`sha yerda ko`rishlarini xabar beringlar, - dedi.

### Soqchilarning xabar berishi

**11** Ayollar hali yo`lda borishar ekan, soqchilar bo`linmasidan bir nechasi shaharga kirib, sodir bo`lgan barcha hodisotni oliy ruhoniylarga bildirdilar. **12** Ular oqsoqollar bilan to`planib kengashgach, askarlarga ancha pul berib, **13** shunday dedilar: - Sizlar: “Shogirdlari kechasi kelib, biz uxlab yotganimizda Uni o`g`irlab ketishdi”, deb aytinglar. **14** Agarda bu bo`lib-o`tganlar hokimning qulog`iga yetib borsa, bizlar uni shunga ishontiramiz va sizlarni ko`ngilsizlikdan xalos etamiz. **15** Soqchilar esa pulni olib, topshiriqni aytilgandek bajardilar. Shunday qilib, bu hangama to bugungacha yahudiylar orasida ovoza bo`lib keladi.

### Isoning oxirgi buyrug`i

**16** O`n bir shogird Jalilaga, Iso ularga tayin etgan toqqa borishdi. **17** Ular Isoni ko`rib, Unga sajda qildilar. Ba`zilari esa shubhaga bordilar. **18** Iso ularga yaqinlashib, shunday dedi: “Menga osmonda ham, yerda ham butun hokimiyat berilgandir. **19** Shuning uchun borib, barcha xalqlardan shogird orttiringlar. Ularni Ota, O`g`il va Muqaddas Ruh nomi bilan suvga cho`mdirib, imonga kiritinglar. **20** Men sizlarga buyurgan hamma narsaga amal qilishni ularga o`rgatinglar. Mana, Men har kuni, dunyoning oxirigacha sizlar bilan birga bo`laman”. Omin.